

NO MATTA YOTTINIRI LINJIILA ON NON

Taariika fii Iwdi Iisaa Almasiihu on

(Luk. 3.23-38)

- 1** ¹Taariika iwdi Iisaa *Almasiihu mo Daawuuda mo Ibraahiima.
²Ko Ibraahiima jibini Issaaqa, Issaaqa jibini Yaaquuba, Yaaquuba jibini Yahuuda e musibbe mun ben, ³Yahuuda kadi jibini Faarisa e Zaaraha, tawi yumma ben no wi'ee Tamaaru. Faarisa jibini Hasruunu, Hasruunu jibini Araama, ⁴Araama jibini Ammiina-Daaba, Ammiina-Daaba jibini Nahasuuna, Nahasuuna jibini Salmaana, ⁵Raab*i jibinani Salmaana Bo'aaza, Rugiyata jibinani Bo'aaza Obiida, Obiida jibini Yassaa'u, ⁶Yassaa'u jibini Daawuuda lando on, oo wonnoodo beyngu Uriyaa jibinani mo kanko Daawuuda Sulaymaana.
- ⁷Sulaymaana jibini Rahabaama, Rahabaama jibini Abiiya. Abiiya jibini Asaa, ⁸Asaa jibini Yuhusaafata, Yuhusaafata jibini Yuuraama, Yuuraama jibini Uziiya, ⁹Uziiya jibini Yotaana, Yotaana jibini Ahaaza, Ahaaza jibini Hazikiiya, ¹⁰Hazikiiya jibini Manase, Manase jibini Amuunu, Amuunu jibini Yuusiya, ¹¹Yuusiya jibini Yeekoniya e musibbe mun ben fewndo egginegol nabee *Baabiila.
- ¹²Bawto egginegol nabee Baabiila ngol, Yeekoniya jibini Sa'alti'iila, Sa'alti'iila jibini Zarubaabila, ¹³Zarubaabila jibini Abiyuuda, Abiyuuda jibini Alyaqiima, Alyaqiima jibini Aazuru, ¹⁴Aazuru jibini Saduuqa, Saduuqa jibini Akiima, Akiima jibini Eliyuuda. ¹⁵Eliyuuda jibini Eliyaasaru, Eliyaasaru jibini Mataana, Mataana jibini Yaaquuba. ¹⁶Yaaquuba jibini Yuusufu moodibbo Mariyama on, on jibinnoodo Iisaa wi'aado Almasiihu on.

¹⁷Gila e Ibraahiima haa e Daawuuda, fow mun hawri jamaanuuji sappoo e nay. Gila e Daawuuda kadi haa e egginegol nabee Baabiila hawri jamaanuuji sappoo e

nay. Gila egginegol nabee Baabiila kadi haa e Almasiihu on ko jamaanuuji sappoo e nay.

Fii Jibineede Iisaa Almasiihu on

(Luk. 2.1-7)

¹⁸ E hino no Iisaa Almasiihu on jibiniraa. Tawi ko Yuusufu yami Mariyama yumma makko. Ado be yiidude, tawi kanko jiwo on ko o sowiido e dow bawgal *Ruuhu Seniido on. ¹⁹ Tawi Yuusufu, on yamudo mo, ko gorko feewudo, hari o faalaaka mo wirtude, o mijii accitugol mo e nder gundoo.

²⁰ Nde tawnoo himo mijii dun, malaa'ikaajo Joomiraado on feejnani mo e koydol, wi'i mo: «Yuusufu mo Daawuuda, wota a hulu yettugol Mariyama, o wona beyngu maa, ko fii biddo mo o saawi on ko immorde e Ruuhu Seniido on. ²¹ O heboyay biddo, innoyaa mo Iisaa, ko fii ko kanko dandoya jaamaa makko on lette junuubaaji mabbe din.»²² Dun fow wadiri fii ko Joomiraado on daalirnood annabaajo on kon no laatora, wonde: ²³ «Awa, jiwo mo andaali gorko on reeday, o firtoo boobo gorko, o innee Imanu'iila.» Ko woni firo dun ko: «Alla no wondi e men.»^a

²⁴ Bay kanko Yuusufu o finii, o wadi ko malaa'ikaajo Joomiraado on yamiri mo kon, o yetti beyngu makko, o addi ka makko. ²⁵ Kono laatii o yiidaali e debbo on haa nde o firtinoo on biddo gorko, o inni mo Iisaa.

Fii no Jom-Gande'en Ardi Bayti-Lahiimi

2 ¹ Bay wonii Iisaa jibinaama Bayti-Lahiimi, dun ko e nder diiwal *Yahuuda fewndo laamu *Heroodu, onsay gandidube iwri funnaange ari *Yerusalaam, ² be wi'i: «Ko honto oo lando *Yahuudiyankeebe ardo e jibineede woni? Ko fii men yi'ii hoodere makko nden ka funnaange, men arii sujjangol mo.»³ Bay kanko Heroodu

^a1.23 Isa. 7.14

lando on o nanii dün, o jiiбii, o jiiбodi e бe Yerusalaam бen fow.⁴ Onsay o mottindiri hooreebe *yottinoobe sadaka бen fow e jannoobe fii Sariya on fii landagol бe ko honto *Almasiihu on haanaa jibinireede.⁵ Ben wi'i mo: «Ko Bayti-Lahiimi e nder ngal diiwal Yahuuda. Ko fii e hino ko annabaajo on windi kon:

⁶«Ko an yo kodolun Bayti-Lahiimi,
jeyaakun e nder leydi bolondaa Yahuuda,
hinaa a gasoohun hayfineede e yeeso
diya kodooli hittudi e nder Yahuuda.
Ko fii lando yaltay e maa
ko ardoor jamaa an *Isra'iila on.»^b

⁷Onsay Heroodu noddi бen gandidube e gundoo, o torii бe yo бe tentinan mo saa'i mo hoodere nden fejni e mun on.⁸ Onsay o immini бe Bayti-Lahiimi, o wi'i бe: «Yahee humpitoyodon no laabiri fii kun paykun. Si on yi'oyii kun, humpiton mi min kadi, mi yaha mi sujjana kun.»⁹ Bay wonii бe nanii ko lando on wi'i kon, бe yahi. Tawi hoodere nde бe yi'unoo ka funnaange nden no wontirde yeeso mabbe. Bay wonii nde hewtii fewndo ka paykun kun woni don, nde darii.¹⁰ Bay kambe gandidube бen бe yiitii hoodere nden, бe heewi weltaare.¹¹ Onsay бe naati ka suudu, бe yi'i paykun kun e yumma mun Mariyama, бe jicci, бe sujjani kun. E hoore dün бe yaltini jawle mabbe, бe okkori kun kanje e urngallo no wi'ee libaana e *mirri.¹² Onsay Allaahu on andini бe e koydol wonde hita бe yiltito ka Heroodu. Be rewti laawol goo, бe hooti ka leydi mabbe.

Fii no Yuusufu Yaltiri Misira

¹³Bay wonii бen gandidube yahii, malaa'ikaajo Joomiraado on feejani Yuusufu e koydol, o wi'i mo: «Immo, yettaa paykun kun e yumma mun, dogaa yahaa

^b2.6 Mik. 5.1

*Misira, wonaa ton haa nde mi wi'i yo a artu woo. Ko fii Heroodu däbbitoyay paykun kun fii warugol kun.»¹⁴ Yuusufu immii jemma, yetti paykun kun e yumma mun, yahi Misira. ¹⁵ O woni ton haa Heroodu maayi. Ko nii ko Joomiraado on daalirnoo annabaajo on kon laatori, wonde: «Mi noddii Biddo an on yo o yaltu Misira.»^c

¹⁶ Bay Heroodu yi'ii wonde gandidube ben janfike mo, o tikki. Onsay o yamiri yo ɓe waroy kala paykun gorun kun duubi didi maa jaasukun dun wonkun e nder Bayti-Lahiimi e kodoloy takkiikoy don koy, dun yaadi e saa'i mo gandidube ben fejninanoo mo on. ¹⁷ Ko nii ko daaliranoo annabi Yeremiiya kon laatori, wonde:

¹⁸ «Hito nanike ka wi'etee don Raama:

wullaandu e sowru tiidundu.

Tawi ko Raahilu woni wullude ɓibbe mun ben,

o jabaano yarlineede, ko fii ɓe woodaaka han kadi.»^d

Fii no Yuusufu Yiltitori Leydi Isra'iila

¹⁹ Bay wonii Heroodu maayii, malaa'ikaajo Joomiraado on feenani Yuusufu e koydol Misira, ²⁰ o wi'i mo: «Immo, yettaa paykun kun e yumma mun, yiltitodaa leydi Isra'iila, ko fii faalanoobe warude paykun kun ben maayii.»²¹ Onsay Yuusufu yetti paykun kun e yumma mun, o yahi leydi Isra'iila. ²² Kono o nani wonde Arkalaawu laamike diiwal Yahuuda ngal lonto ben mun Heroodu, o huli wonoygol ton. Allaahu on banginani mo e koydol, o yaari e ngal diiwal Jaliilu, ²³ o wonoyi e saare no wi'ee Naasirata, fii no ko daaliranoo annabaabe ben kon laatora, wonde: «O noddoyte Naasirayankoojo.»

^c2.15 Hus. 11.1

^d2.18 Yer. 31.15

Fii no Yaaya Lootiraynoo Maande Tuubuubuyee Waajo

(*Mrk. 1.1-8; Luk. 3.1-18; Yhn. 1.19-23*)

3 ¹Ko e on saa'i don, Yaaya *lootoowo maande tuubuubuyee on fejni, tawi himo waajoo ka wulaa diiwal Yahuuda, ²himo wi'a: «Tuubee, ko fii laamu kammu ngun badike!»³ Tawi ko fii makko annabi *Isaaya wowlunoo, o wi'i:

«Kaa hawa ko hawa ewnotoodo ka wulaa, wi'a:

«Moyýinee laawol Joomiraado on,
fewnon juri makko din!»»^d

⁴Tawi dolokke Yaaya on ko leebi ngelooba, dattol keeci makko din ko guri. Tawi ko kanu e njuuri buruure o jaamata. ⁵Hodube Yerusalaam ben e be ka diiwal Yahuuda ben fow e kodooli hundudi Yurdayniwol din fow ari e makko. ⁶Be qirritii junuubaaji mabbe din, o looti be maande tuubuubuyee ka maayo Yurdayniwol.

⁷ Bay o yi'ii *Fariisiyaabe e *Sadduusiyaabe buy no arude fii *lootegol maande tuubuubuyee, o wi'i be: «Ko onon yo iwdi kuura! Ko hombo tindini on dogugol tikkere aroyaynde nden? ⁸Awa yo kuude mon den hollu wonde on tuubii. ⁹Hara on hooloraali wi'ugol wonde ko Ibraahiima woni maama mon, ko fii mi andinii on, Alla no waawi wattude dee kaaye doo bibbe Ibraahiima. ¹⁰Toode teenirde nden no waalii ka binde ledde. Kala leggal ngal rimataa bibbe moyýube, ngal soppete, ngal bugee ka yiite!

¹¹ «Min ko ndiyan mi woni on lootirde maande tuubuubuyee. Kono on aroyoowo 6aawo an no buri lan doole, awa kadi mi hewtaa hay solugol pade makko den. On non ko *Ruuhu Seniido on e yiite o lootirta on. ¹²Himo jogii feeteewo makko

^d3.3 Isa. 40.3

ngon ka jungo ko o hentinira bete^e makko on, o mooba jaametee on ka beembal makko, o sunnira foron on yiite nge daanotaako.»

Fii no Iisaa Lootiraa

(*Mrk. 1.9-11; Luk. 3.21-22*)

¹³ Onsay Iisaa iwri Jaliilu, o ari Yurdayniwol ka Yaaya, fii yo on lootu mo.

¹⁴ Kono Yaaya salii, wi'i: «Ko min haani arude yo a lootan! Kono an a arii yo mi loote!»¹⁵ Kono Iisaa jaabii mo wi'i: «Accu wonira non, ko fii ko nii haanirani en timmingol peewal ngal fow.» Ko e hoore dun Yaaya jabi mo lootude. ¹⁶ No Iisaa gayniranoo looteede, o yawi ka ndiyan, tun kammu ngun udditii, o yi'i Ruuhu Allaahu on no tippora e makko wa gabooru. ¹⁷ Onsay hawa nanii ka kammu, no wi'a: «Ko oo woni Biddo an Yidaado, mo mi weltori on!»

Fii no Ibiliisa Ndarndori Iisaa

(*Mrk. 1.12-13; Luk. 4.1-13*)

4 ¹ Bawto dun, Ruuhu Allaahu on nawri Iisaa ka wulaa fii no Ibiliisa ndarndora mo.

² O hoori balde cappande nay, jemma e nalorma. Bawto dun o weelaa.

³ Ndarndotoodo on badii mo, wi'i: «Si tawii ko a *Biddo Alla, yamir dee kaaye yo de wontu jaametee.»

⁴ Iisaa jaabii: «No windii wondema: <Neddo hinaa jaametee tun wuuriita, kono ko kala kongudi iwrudi ka Alla.»^f

⁵ Ibiliisa nawri mo kadi ka saare hormorde, dun ko Yerusalaam, o joddfinoyi mo ka hoore warjakere *juulirde mawnde, o wi'i mo: ⁶ «Si tawii ko a Biddo Alla, hocco don cikkodaa ka leydi, ko fii no windii wondema: <O yamiray malaa'ikaabe

^e3.12 Maa: «gete».

^f4.4 Yaj. 8.3

makko 6en fii maa, 6e tamboro-maa juude mabbe ðen, fii wota koyngal maa ngal feggo e hayre.»^g

⁷ Iisaa jaabii mo wi'i: «No windii kadi wondema: ‹Wota a ndarndo Joomiraado on, on Alla maa.»^h

⁸ Ibiliisa nawri mo kadi e fello toowungo fota, o holli mo laamateeriji aduna on fow e darja mun. ⁹ O wi'i mo: «Mi okkete dun fow si a jicci, a sujjanii lan.»

¹⁰ Iisaa jaabii, wi'i: «Pottito, yo Ibiliisa, ko fii no windii: ‹Ko Alla Joomiraado maa on sujjantaa, rewaa mo kanko tun.»ⁱ

¹¹ Onsay Ibiliisa pottitii mo. Bawto dun malaa'ikaabe 6adii Iisaa fii kurkanagol mo.

Fii Ardu Iisaa ndun Jaliilu e Kafernahuum

(Mrk. 1.14-15; Luk. 4.14-15)

¹² Bay Iisaa andii Yaayaa wattaama e joge, o yahi Jaliilu. ¹³ O eggı Naasirata, o yahi, o hodoyi Kafernahuum ka daande weendu ka kernidi don e Zabuluunu e Naftali, ¹⁴ fii no ko daaliranoo annabi Isaaya kon laatora, wonde:

¹⁵ «Ko an yo leydi Zabuluunu e Naftali
leyde wonde ka daande weendu,
gada Yurdayniwol,
dun ko Jaliilu ka diya leyýi hodí e mun.

¹⁶ Oo jamaa wondo e nder niwre
yi'ii ndaygu moolanaangu,
e hoore 6en joodiibe e ndin leydi
ndi dowdi mayde woni e mun,
ndaygu jalbanii 6e.»^j

^g4.6 Zab. 91.11-12

^h4.7 Yaj. 6.16

ⁱ4.10 Yaj. 6.13

¹⁷ Gila dün Iisaa fuddii waajaade, wi'a: «Tuubee, ko fii laamu kammu ngun 6adike!»

Fii Be Iisaa Adii Noddude 6en

(*Mrk. 1.16-20; Luk. 5.1-11*)

¹⁸ E nder ko o yiilotoo e daande *Weendu Jaliilu ndun kon, o yi'i musibbe dido no bugoo *jalaaji ka weendu, tawi 6en ko yungoobe: goddo on no wi'ee Sim'uunu, mo o jammoya Petruusu, oya on no wi'ee Andaraawu, mijnjiraawo makko kanko Sim'uunu on. ¹⁹ O wi'i 6e: «Jokkee lan, mi wattay on yungoobe yimbe.»²⁰ Don kisan 6e acciti jalaaji din, 6e jokki mo.

²¹ E nder yaadu mabbe ndun, Iisaa yi'i musibbe dido goo kadi, tawi 6en ko Yaaquuba e mijan mun Yuuhanna, 6en ko 6ibbe Zabadii. Tawiben no wondi e ben mun Zabadii ka nder laana, hibe moyyintina jalaaji mabbe. Kanko Iisaa o noddi 6e. ²² Don kisan 6e acci don laana kan e ben mabbe, 6e jokki mo.

²³ Tawi Iisaa no yiiloo e nder Jaliilu fow, janna ka nder juulirde, waajoo fii Kibaaru Moyyo *laamu Alla ngun, e himo jawndora kala noone nabbeeli e nawnaje yimbe 6en. ²⁴ Fii makko andii e nder Sirii on fow. O addanaa kala tampirdo nawnare e noonee muuseendiiji e 6e jinna e iirotoobe e maaya-banduu6e, o ndikkini 6e. ²⁵ Jamaa moolanaado iwrudo Jaliilu e *Dekapooli e Yerusalaam e diiwal Yahuuda ngal e 6e gada Yurdayniwol jokki mo.

Fii Waaju ngun ka hoore Fello

(*Mrk. 3.13; Luk. 6.12-13; 20-26*)

5 ¹ Bay Iisaa yi'ii jamaa on, o yawi ka fello, o joodii, taalibaabe makko 6en kadi 6adii mo. ² Onsay o woni e jannugol jamaa on, wi'a:

^j4.16 Isa. 8.23 e 9.1

³ «Yondiniibe ka bernde ben ko malaabe,
bay laamu kammu ngun ko kambe wonani.

⁴ Yoomube ben ko malaabe,
bay berde mabbe buttinoyte.

⁵ Newiibe ben ko malaabe,
bay be ronoyay leydi ndin.^k

⁶ Weelaabe dondaa peewal ben ko malaabe,
bay be harnoyte.

⁷ Yurmeteebe ben ko malaabe,
bay be yurminoyte.

⁸ Laaba-berndeebe ben ko malaabe,
bay be yi'oyay Alla.

⁹ Buttinoobe ben ko malaabe,
bay be noddroyte bibbe Alla.

¹⁰ Cukketeebe sabu peewal ngal ko malaabe,
bay laamu kammu ngun ko kambe wonani.

¹¹ «On wonay malaabe nde be yenni on e nde be cukkii on e nde be fawi penaale e
kala bone e hoore mon sabu an. ¹² Weltee, wonon e nder welo-welo, bay hidon
maranaa njoddi mawndi ka kammu, ko fii ko nii be cukkornoo annabaabe
adinoobe on ben.

¹³ «Ko onon woni landan aduna on. Kono si dakamme majjan on iwii, haray ko
honno dakamme majjan on wattirtee? Haray dan alaa nafa fus si hinaa bugegol ka
yaasi, dan yaabee.

¹⁴ «Ko onon woni ndaygu aduna on. Si saare wonii e hoore fello, haray nde
waawetaake suudeede. ¹⁵ Hay gooto hubbintaa lampu, hippa mo e miran, kono o

^k5.5 Maa: «aduna on».

waday mo e kene, o ndayginana kala wondo ka nder suudu.¹⁶ Yo ndaygu mon ngun jalgir nii yeeso yimbe ben, fii no be yi'ira kuude mon moyye den, be mawnina Ben mon Wondo ka kammu on.»

Fii Laatingol Sariya on

¹⁷ «Wota on sikku ko mi arani ko fii firtugol Sariya on maa ko annabaabe ben wi'i kon. Min mi ardaali fii firtugol di, kono ko fii laatingol di.¹⁸ Ka haqiiqa mi andinii on, haa kammu ngun e leydi ndin muta, ko hay ciifun e tobbere iwataa e nder bindol Sariya on, haa fow laatoo.¹⁹ Kala non bonnudo gootel e burngel fandude e yamirooje den, janni kadi yimbe ben warrugol wano non, o innete burdo fandude e laamateeri kammu ngun. Kono kala doftiido janni, on innete teddudo e nder laamateeri kammu ngun.²⁰ Awa mi andinii on, si peewal mon ngal buraali ngal jannoobe fii Sariya on ben ngal e ngal *Fariisiyaabe ben ngal, on naatataa ka laamateeri kammu few.

²¹ «On nanii wonde maamaabe men ben wi'ano: ‹Wota a ittu hoore^m, kala on ittudo hoore jaawete.›²² Kono min mi wi'ay on, kala tikkando musiddo mun jaawete. Kala wi'udo musiddo mun kadi ‹komoojo›jaawete yeeso dental fewjoobe ben. Kala non wi'udo musiddo mun ‹la'iifu› haray no e laawol yiite jahannama.

²³ «Si hida sakkaade ka juulirde, a anditii don wonde musiddo maa no monoran-maa godfun,²⁴ haray accu don ittugol sadaka maa on, yahaa taho moyyintinoyaa hakkunde maa e musiddo maa on, si araa non ittaa sadaka maa on.

²⁵ «Eto no faamondiriraa e mo habidudaa on kisan fewndo wonudon ka datal, fii wota on mo habidudaa watte e juude jaawoowo on, on jaawoowo kadi watte e

^m5.21 Egg. 20.13

juude suufaajo on, on wade ka kaso.²⁶ Ko fii ka haqiiqa mi andinii ma, a yaltataa don fannamaa a yobaali mbuuudu sakkitoro on.

²⁷ «On nanii kadi wi'aama wonde: «wota a jeenu.»ⁿ²⁸ Kono min mi wi'ay on, kala ndaarudo debbo fii himmangol mo, haray ontigi jeenii mo ka bernde mun.²⁹ Si tawii yiitere maa jaamere nden wonay sabu haa feggodaa, haray awu nde, bugodaa nde ka wodditi-maa. Ko fii no buru-maa moyyande ka teral maa gootal hayra, edii ka bandu maa ndun fow bugee ka jahannama.³⁰ Si tawii jungo maa naamo ngon kadi wonay sabu haa feggodaa, haray tayu ngo, bugodaa ka wodditi-maa. Ko fii no buru-maa moyyande ka teral maa gootal hayra edii ka bandu maa ndun fow yaha ka jahannama.

³¹ «Wi'aama kadi, kala on accitudo beyngu mun haray yo o wadan mo kaydi sertigal.ⁿ³² Kono min mi wi'ay on, kala on accitudo beyngu mun, si hinaa hara on jeenu, haray o wadii mo jeenoowo. Kala non kadi yettudo debbo seedaado haray ondon kadi jeenii.

³³ «On nanii kadi wonde maamaabe men ben wi'ano: «Wota mo firta woondoore, hunnu woondooje de woondandaa Joomiraado on den.»ⁿ³⁴ Kono min mi wi'ay on, wota on woondu toode, wota on woondir kammu ngun, ko fii ko ngu jullere laamu Alla.³⁵ Wota on woondir kadi leydi ndin, ko fii ko ndi ndaddudi tundaaje makko den, maa woondiron Yerusalaam, ko fii ko saare Lando Mawdo on non.

³⁶ Wota mo woondira hoore mun nden kadi, ko fii on waawaa rawninde maa bawlinde hay cukulol gootol.³⁷ Yo «hiiyii» mon on wonu «hiiyii», «oo'o» mon on wona «oo'o.» Ko beyditaa e dun woo, haray ko e Ibuliisa iwri.

ⁿ5.27 Egg. 20.14

ⁿ5.31 Yan. 24.1

ⁿ5.33 Ada. 30.3 e Yan. 23.22

³⁸ «On nanii kadi wi'aama wonde: <ko yiitere yobirtee yiitere, niire yobiree niire.»^{p39} Kono min mi wi'ay on, wota mo dartoo bondo, awa kadi mo bantike ma e wabbugo jaamo, tudan mo ngoya kadi. ⁴⁰ On mo faala-maa nabude ka naawoore fii yettugol ma fokiya on, accidu mo e waramba on kadi. ⁴¹ On mo karhu-maa kadi rondanagol mo dongal, nabaa yeru sagara gooto, naban mo yeru sagara didi. ⁴² Okkor on toriido ma, wota a huccu kadi on faalaado ma jawaade.

⁴³ «On nanii kadi wi'aama wonde: <Yo a yidu gido maa, anaa gano maa.»⁴⁴ Kono min mi wi'ay on: yidee aybe mon ben, toranodon wonbe cukkaade on ben, ⁴⁵ dun on wonay bibbe Ben mon Wondo ka kammu on. Ko fii himo fudinana bonbe ben e moyube ben naange makko ngen, himo saayinana kadi feewube ben e be feewaa ben ndiyan dan. ⁴⁶ Si tawii non ko yidube on ben tun yidudon, haray ko mbarjaari hondi heboyton? E hinaa yantiroobe sagalle janfa ben kadi ko non warrata? ⁴⁷ Si tawii ko musibbe mon ben tun hiwrotodon, haray ko hondun wadudon ko beyditii? Hinaa be gomdinaa ben kadi ko non warrata? ⁴⁸ Awa wonee timmuibe wano Ben mon kammuyankeejo on woniri Timmudo non.»

Fii no Iisaa Waajori fii Sakkagol e Juulugol e Hoorugol

6¹ «Reenee e wadirgol golle mon moyye den yiingo. Si hinaa dun on hebataa njoddi ka Ben mon Wondo ka kammu on.

² «Nde hidon okkora miskinbe ben, wota on wuttu *liite yeeso mon wano faasiqiibe ben gerdata non ka juulirde e ka date fii no yimbe ben mantira be. Ko fii ka haqiqiqa mi andinii on be hendike mbarjaari mabbe ndin. ³ Nde hidon okkora miskinbe ben, wota jungo mon nano ngon andu ko jaamo ngon wadi kon, ⁴ fii no dokkal mon ngal wonira e gundoo, dun Ben mon, on Yi'oowo ko yi'otaako, jonnitoyay on mbarjaari mon ndin.

^p5.38 Egg. 21.23-25.

⁵ «Nde hidon juula kadi wota on wa'u wa faasiqiibe ben, ben yidube juulugol hara no darii ka nder juulirde e ka sera ballanje fii hollitagol yimbe ben. Ko fii, ka haqiqiqa mi andinii on, be hendike mbarjaari mabbe ndin. ⁶Kono onon, nde hidon juula, naatee ka nder cuudi mon, ombon baafe mon den, juulon e Ben mon mo yi'otaako on. Dun, Ben mon Yi'oowo ko yi'otaako kon, jonnitoyay on mbarjaari mon ndin.

⁷ «Nde hidon juula, wota on fillifillinno haalaaji duududi wano be wonaa Yahuudiyanke ben non, ko fii ben no sikka ko no be duddiniri haalaaji woo be jabirantee. ⁸Wota on nandintino e mabbe, ko fii Ben mon no andi ko hondun faaladon ado on toraade mo.

⁹ «Ko nii haanudon tororde Alla:

↳ Baaba amen Wondo ka kammu,
yo innde maa nden hormore,
¹⁰ yo laamu maa ngun feeju,
yo faale maa on wadu ka aduna
wano woniri non ka kammuuli.

¹¹ Okkor men hande jaametee haanando men on.

¹² Yaafanodaa men bonnereeji amen din,
wano menen kadi men yaaforani bonnube men ben non.

¹³ Wota a naadu men e jarrabuyee,
kono jattin men Bondo on.

Ko fii ko an heerori laamu e bawgal e mangu, haa poomaa. Aamiina.»

¹⁴ «Si on yaafanike yimbe ben bonnereeji mabbe din, haray Baaba mon kammuyankeejo on yaafanto on onon kadi bonnereeji mon din. ¹⁵Kono si on yaafanaaki yimbe ben, haray Ben mon kadi yaafantaako on bonnereeji mon din.

¹⁶ «Nde hidon hoora, wota on nirbin geece mon den wa faasiqiibe ben, ko fii kambe be waylay geece mabbe den fii hollugol yimbe ben wonde hibe hoori. Ka

haqiiqa mi andinii on, kambe be hendike mbarjaari ma66e ndin.¹⁷ Kono onon, nde hidon hoora, urnee ko'e mon den, looton geece mon den,¹⁸ fii wota on hollu yimbe ben wonde hidon hoori, hara ko Ben mon mo yi'otaako on tun yi'i kon ko wadudon e nder gundoo. Dun, Ben mon Yi'oowo ko yi'otaako on, jonnitay on mbarjaari mon ndin.»

Fii Keyee Haqinqindo on

(Luk. 12.33-34)

¹⁹ «Wota on moobu jawle ka hoore leydi, ka de bonirta wudugol e kornugol, e ka wuybe fusata yetta. ²⁰ Kono moobee de ka kammu ka de wudataa e ka de kornataa e ka wuybe fusataa yetta. ²¹ Ko fii ko ka keyee mon on woni woo, bernde mon nden wonata.

²² «Ko yiitere woni ndaygu bandu. Si tawii yiitere nden no selli, haray bandu ndun fow no ndaygi. ²³ On mo yiitere mun nawi, haray bandu ontigi ndun fow no e nder niwre. Si tawii non ngun ndaygu wongu e ontigi ko niwre, haray ko embere honto nden niwre mawni!

²⁴ «Hay gooto waawataa gollande jey6e dun dido, ko si o ajay oya, o yida oya, maa o habboo e oya, o itta bote e oya. Ko dun wadi si on waawataa rewude Alla rewon jawdi.

²⁵ «Ko dun wadi si mi wi'ay on: wota on aanu fii ko jaamon maa ko yaron e nder ngurndan mon dan, maa fii ko bornon balli mon din. Taw si hinaa ngurndan buri neema, awa kadi bandu buri koltu? ²⁶ Ndaaree colli din ka kammu: di sankataa, di wa'ataa, di moobataa hay huunde e nder caagaaje, kono Ben mon Kammuyankeejo on no wurni di. E taw si on buraa di hittude? ²⁷ Ko hombo e mon, e nder annde mun, waawata beydude ngurndan mun dan beru sogonal gootal?

²⁸ «E ko hondun aananton fii conci? Ndaaree no dii piindiji ka gese fudirta njanda: hara-le di gollataa, di sajnataa. ²⁹ Kono non mi andinii on, hay

Sulaymaana e nder darja mun on fow holtiraali hay wa wootiri e majji.³⁰ Si tawii non Allaahu on no holtinirde non hay hudo wonuko hande ka ngesa kon, bugoyteko jango ka yiite kon, hara o ronkay wadande on ko buri dun, onon bee fanda-gomdinalbe?³¹ Awa wota on aanu haa wi'on: <ko hondun men jaamata?> maa: <ko hondun men yarata?> maa: <ko hondun men bornotoo?>³² Dun, ko be gomdinaa ben dabbaata dun. Kono Ben mon Kammuyankeejo on no andi hidon handi e dun.³³ Kono dabbee taho laamu makko ngun e peewal makko ngal, din pijji fow beydanoyte on.³⁴ Awa wota on aanu fii jango, ko fii jango aananay hoore mun. Nalaande bee arday e maapunde mun.»

Fii Naawugol e Etugol

(Luk. 6.37-42)

7¹ «Wota on jaawu fii wota on jaawe.² Ko fii, ko wano jaawirdon non jaawirtedon, e ko sariyaare nde etirdon nden etirantedon.

³ «Ko honno yiirataa lojol wongol ka yiitere musiddo maa on, hara a yi'aali falimawal wongal ka yiitere maa ngal?⁴ Ko honno wawrataa wi'ude musiddo maa on: <Accu mi ittane lojol ngol ka yiitere maa>, e hara falimawal no ka yiitere maa an?⁵ Ko an yo faasiqijo, ittu taho falimawal wongal ka yiitere maa ngal, onsay non a yi'ay no ittiranaa musiddo maa on lojol wongol ka yiitere makko ngol.

⁶ «Wota on yettu ko hormortee kon, jonnon bareeji din, fii wota di yiltito di yakka on. Wota on bugo kadi kode mon lambiri den yeeso koseeji din, sakko di yaaba de.

⁷ «Toree, on okkorte. Dabbee, on hebay. Hoddee, on udditante.⁸ Ko fii kala toriido okkorte, kala dabbuso hebay, awa kadi kala on hoddiido udditante.

⁹ «Ko hombo e mon, biddo mun torotoo dun bireedi, ontigi jonna mo hayre?

¹⁰ Maa o toroo mo lingii, ontigi jonna mo mboddi?¹¹ Si tawii non hay onon bonbe ben hidon waawi wadande bibbe mon ben pijji moyyi, haray ko haa honto Ben

mon Wondo ka kammu on okkorta ben toriibe mo moyyereeji! ¹² Wadanee yimbe ben wano faaliradon yo be wadan on non. Ko fii ko dun Sariya on e annabaabe ben wi'i.»

Fii Date den Didi

(Luk. 13.24)

¹³ «Naatiree ka dambugal faadungal. Ko fii dambugal nawrayngal e hayrannde ngal ko yaajungal. Datal nawrayngal e hayrannde ngal kadi ko weebungal, awa-le duudube naatiray don. ¹⁴ Kono dambugal nawrayngal e ngurndan ngal e datal nawrayngal e ngurndan ngal ko faadude, kono ko seedaafe hebata den.»

Fii Waditiibe ko Annabaabe

(Luk. 6.43-44)

¹⁵ «Awa reenee e waditiibe annaba ben, ko fii be arday e mon wa baali, kono hara ka nder ko be caapaali hunyudi. ¹⁶ Ko kuude mabbe den anditirton be. E hara en ittay sungala^q e hoore bulle-kojon, maa yibbe e hoore bulle-baali? ¹⁷ Kala leggal moyyal ko bibbe moyyube rimata, kono leggal bongal ko bibbe bonbe rimata. ¹⁸ Leggal moyyal waawataa rimude bibbe bonbe, leggal bongal kadi waawataa rimude bibbe moyyube. ¹⁹ Kala leggal ngal rimataa bibbe moyyube ko soppeteengal bugee ka yiite. ²⁰ Awa ko kuude mabbe den anditirton be.

²¹ «Hinaa wi'oobe lan <Koohoojo, Koohoojo>ben fow naatata ka laamateeri kammu, kono ko wadaybe ko Baaba an Wondo ka kammu on faalaa kon tun.

²² Nden jande, buy wi'oyay lan: <Koohoojo, Koohoojo! Taw si hinaa e innde maa men haaliraynoo ko Alla longini men, men radora kadi jinnaaji e innde maa, men wada kadi kaawakeeji moyyi buy e innde maa?>²³ Onsay mi wi'oyay be: <Mi andaano on few. Pottitee lan, yo onon wadoobe ko boni!>

^q7.16 Maa:«sumbala».

²⁴ «Awa kala nanudo dii kongudi an, huutori di, wa'ay wa faamudo, darnudo suudu mun e hoore fetere. ²⁵ Ndiyan dan saayi, waameeji din ari, keneeli din wifi, din piyii e ndun suudu, ndu ronka yanude, ko fii hari ko e fetere ndu darii. ²⁶ Kono kala nanudo kongudi an din, huutoraali di, on no wa'i wa njofoojo darnudo suudu mun e hoore njaare. ²⁷ Ndiyan dan saayi, waameeji din ari, keneeli din wifi, din piyii e ndun suudu, ndu yani, yanal tiidfungal.»

²⁸ Bay wonii Iisaa timminii yewtere mun nden, jamaa on ȳaldī fii ko o jannaynood kon, ²⁹ ko fii hari himo jannirde Ȅe bawgal, hara wonaa wano jannoobe fii Sariya on Ȅen janniraynood non.

Fii no Iisaa Nawndiri mo Damajan

(Mrk. 1.40-45; Luk. 5.12-16)

8 ¹ Bay wonii Iisaa tippike ka fello, jamaa moolanaado jokki mo. ² Onsay mo damajan ari jicci yeeso makko, wi'i: «Koohoojo, si hidon faalaa, hidon waawi lan sellinde, mi laaba.»³ Iisaa fonti jungo mun ngon, meemi mo, wi'i: «Mido faalaa, laato selludo, laabaa.» Don kisan o selli damajan dan, o laabi. ⁴ E hoore dun Iisaa wi'i mo: «Reeno wota a wowlan dun hay gooto, kono yahu hollitoyodaa *yottinoowo sadaka on, ittaa sadaka wano Muusaa yamiri non, fii yo dun wonan Ȅe seedee.»

Fii no Iisaa Selliniri Kurkaadu Suufaajo

(Luk. 7.1-10; Yhn. 4.43-54)

⁵ Bay wonii Iisaa naatii Kafernahuum, hooreejo suufaabe teemedere badii mo, jeeji, ⁶ wi'i: «Koohoojo, kurkaadu an ndun no waalii ka suudu, bandu makko ndun no maayi, awa kadi himo tampi fota.»

⁷ Iisaa wi'i mo: «Mi yahay, mi sellina mo.»

⁸ Onsay kanko hooreejo suufaaþe þen o jaabii mo, o wi'i: «Koohoojo, mi foddaa e mo'on ka suudu an. Kono maakee tun kongol gootol, kurkaadu an ndun ndikkay.

⁹ Ko fii min tigi, ko mi wondo e ley kongol hooreeþe goo, min kadi mido mari suufaaþe wonþe e ley kongol an. Si mi wi'ii godðo e þen *«yahu»*, o yahay. Si mi wi'ii oya on *«aru»*, o aray. Awa kadi si mi wi'ii kurkaadu an ndun *«wadu dun»*, ndu waday.»

¹⁰ Bay Iisaa nanii dun, o ðaldi, o wi'i jokkubé mo þen: «Ka haqiqqa mi andinii on, hay ka *Isra'iila'en mi yi'aali nedðo gomdinirdo wa oo. ¹¹ Mi andinii on, duudube iwroyay funnaange e hirnaange, þe nafodoya e Ibraahiima e Issaaqa e Yaaquuba ka laamateeri kammu. ¹² Kono haanunoþe ronude laamateeri ndin þen bugete ka niwre ka buri wodðude, ka wullaandu e ðatindiro niiyé woni ton.»

¹³ Onsay Iisaa wi'i on hooreejo suufaaþe þen: «Yahu, yo dun wonirane wano gomdinirdaa non.» E on saa'i tigi kurkaadu ndun sellinaa.

Fii no Iisaa Nawndiri Nawnubé buy

(*Mrk. 1.29-34; Luk. 4.38-41*)

¹⁴ Bawto dun Iisaa yahi ka galle Petruusu, o tawi esiraawo Petruusu suddiido on no waalii nawnare nguli-bandu. ¹⁵ O meemi jungo on ngon, nguli-bandu kin yalti e makko. Onsay on immii, o woni e kurkanagol Iisaa.

¹⁶ Bay nibbii, þe addani mo duudube þe jinna nangi, o radori din jinnaaji kongol makko ngol, o sellini nawnubé þen fow. ¹⁷ Ko nii ko daaliranoo annabi Isaaya kon laatori, wonde:

«O yettii nawnaje men den,
o fawtike nabbeeli men din.»^r

^r8.17 Isa. 53.4

¹⁸ Bay Iisaa yi'ii jamaa hundudo mo on, o yamiri taalibaabe makko ɓen yo ɓe lumbitu gada. ¹⁹ Jannoowo fii Sariya on goo ɓadii mo, wi'i: «Karamoko'en, mi jokkete kala ka yaarudaa.»

²⁰ Iisaa jaabii mo wi'i: «Ndoni din no mari gayde mun, awa kadi colli din ka weeyo no mari jnakkaji mun, kono *Bii-Aaden on kan alaa hay ka fowtina hoore mun nden.»

²¹ Goddo e taalibaabe ɓen wi'i mo: «Koohoojo, newnanee lan taho mi yaha, mi wattinoya ben an en.»

²² Kono Iisaa jaabii mo, wi'i: «Jokkan, accaa maybe ɓen wattina maybe mun ɓen.»

Fii no Iisaa Deeyiniri Waabiliire nden

(*Mrk. 4.35; Luk. 8.22-25*)

²³ Bawto dñun Iisaa bakii ka laana, taalibaabe makko ɓen kadi jokki mo. ²⁴ Onsay waabiliire tiidunde wondunde e hendu tippii ka weendu haa morloode ndiyen den watti diwude laana kan, tawi kanko himo daanii. ²⁵ Be ari, ɓe findini mo, ɓe wi'i: «Koohoojo, dandu en, en mulay woni!»

²⁶ O wi'i ɓe: «Ko fii hondun hulandon, onon ɓee fanda-gomdinalɓe?» Onsay o immii, o tonjani hendu ndun e morloode ndiyen den, deeyaango tiidungo wadi.

²⁷ Ben ɣaldı fota, ɓe wi'indiri: «Ko hombo woni oo? Ko fii hay keneeli din e baharu on doftoto mo!»

Fii no Jinnanoobe Dido Selliniraa

(*Mrk. 5.1-20; Luk. 8.26-39*)

²⁸ Bay wonii o hewtoyii gada weendu ndun, dñun ko e ndii leydi ɓee Gadariyankoobe, jinnaabe dido sortii ka berde, ari fottugol e makko. Tawi hakkee ko ɓen hulbinii, hay gooto suusataano rewude don. ²⁹ Ben sonki e makko, ɓe wi'i:

«Ko hondun faalanadaa men, an oo *Biddoo Alla. E hara ko arduaa doo ko fii lettugol men hara saa'i on hewtaali?»

³⁰Tawi wuro kose moolanaango no ooraynoo ka wodditii 6e. ³¹Onsay jinnaaji din jeeji mo, dì wi'i: «Si a radoto men, nawru men e ngoo wuro kose.»

³²O wi'i dì: «Yahee!» Onsay dì yalti e 6en, dì naatoyi e nder dìn koseeji. Tun, koseeji dìn fow giddi ka falo, dì unoyii ka weendu, dì muli ka nder ndiyan.

³³Ornaynoobe dì 6en dogi, yahi ka saare, fillitoyii ko wadi kon fow, tentinii ko hebi 6en jinnanoobe kon. ³⁴Onsay yimbe saare nden fow yalti fii fottugol e Iisaa. Nde 6e yiirunoo mo, 6e jeeji mo wodditagol leydi ma6be ndin.

Fii no Iisaa Imminiri Maaya-Banduujo

(*Mrk. 2.1-12; Luk. 5.17-26*)

9 ¹Bawto dun Iisaa bakii don e laana, o lumboyi weendu ndun, o yahi ka saare makko. ²Be addani mo maaya-banduujo waaliido e boggi-dimbordi. Bay Iisaa yi'ii gomdinal ma6be ngal, o wi'i maaya-banduujo on: «Wakkilo yo booboo an. Junuubaaji maa dìn yaafaama.»

³Onsay wobbe e jannoobe fii Sariya on wi'indiri: «Oo neddo no hoynude Alla!»

⁴Nde tawnoo Iisaa no andi mijooji ma6be dìn, o wi'i 6e: «Ko hondun joganidon dii mijooji bondi ka berde mon? ⁵Enee, hakkunde wi'ugol junuubaaji maa dìn yaafaama» e «immo yahaa», ko hondun e dii doo buri weebude? ⁶Fii no andiron wonde *Bii-Aaden on no mari bawgal ka aduna doo fii yaafagol junuubaaji», o wi'i jukkudo on: «Immo yettaa boggi-dimbordi maa dìn, hootaa ka maa.»⁷On immii, o hooti ka makko. ⁸Bay jamaa on yi'ii dün, 6e huli, 6e mawnini Alla, on yedudo yimbe 6en sifa ngal bawgal.

Fii no Matta Jokkiri Iisaa

(*Mrk. 2.13-17; Luk. 5.27-32*)

⁹ Wa ko Iisaa iwata don, o yi'i godđo no wi'ee Matta no joodii ka yantirde sagalle. O wi'i mo: «Aru, jokcaa mi!» Kanko Matta o immii, o jokki mo.

¹⁰ Bawto dñun, Iisaa joodii fii jaamugol ka suudu Matta, tawi *yantoobe sagalle e junuubankeebe duudube no joododi e makko, wondude e taalibaabe makko ñen.

¹¹ Bay *Fariisiyaabe ñen yi'ii dñun, ñe wi'i taalibaabe makko ñen: «E ko fii hondun karamoko mon jaamidanta e yantoobe sagalle ñen e junuubanke'en?»

¹² Bay wonii Iisaa nanii dñun, o wi'i: «Hinaa sellube ñen hatonjini e ñawndoowo, kono ko ñawbe ñen. ¹³ Allaahu non no daali: ‹Ko yurmeende mi faala, wonaa sadaka.›^s Awa, yahee andinoyodon ko woni firo dñun. Ko fii min, wonaa noddugol feewube ñen mi arani, kono ko junuubankeebe ñen.»

Landal fii Hoorugol

(*Mrk. 2.18-22; Luk. 5.33-39*)

¹⁴ Onsay taalibaabe Yaayaa ñen ari e Iisaa, ñe wi'i mo: «Ko fii hondun menen e Fariisiyaabe ñen men hooranta, hara taalibaabe maa ñen kan alaa hoorude?»

¹⁵ Iisaa jaabii ñe wi'i: «Taw si njaatigiibe jom jomba no haani yoomude yeru hibe wondi e jom jomba? Nalaade aroyay nde jom jomba pottinaa e hakkunde maßbe, onsay ñe hooray. ¹⁶ Hay gooto yettataa ceelol bagi keso, walkira dolokke kiddo. Ko fii ceelol ngol pooday dolokke on, haa wuddere nden burta yaajude. ¹⁷ Njaram kesan men loowetaake e nder bootooji guri kisdi. Si hinaa dñun, guri din seekoto, njaram dan hibba, bootooji guri din kadi bona. Kono njaram kesan ko e nder bootooji guri kesi loowetee, di fow di maroda.»

^s9.13 Hus. 6.6

Fii no Iisaa Wurnitiri Jiwo, Sellini Debbo

(*Mrk. 5.21-43; Luk. 8.40-56*)

¹⁸ Wa fewndo ko Iisaa yewtata ɓe dii kongudi, hooreejo goo hewti, jicci yeeso makko, wi'i: «Jiwo an on maayii jooni jooni! Kono aree *fawon juude mon den e hoore makko, o wuuritay.»¹⁹ Iisaa e taalibaabe mun ɓen immii jokki mo.

²⁰ Onsay debbo wonnoodo soncaade gila duubi sappoo e didi ari wontiri baawo Iisaa, o meemi kombol dolokke makko on. ²¹ Ko fii hari on debbo no mijoo wonde: «Si mi waawii tun meemude dolokke makko on, mi ndikkay.»

²² Onsay Iisaa yeýítii. Bay o yi'ii mo, o wi'i: «Wakkilo, yo jiwo an! Gomfinal maa ngal sellinii ma.» On debbo selli e on saa'i tigi.

²³ Bay Iisaa hewtii ka suudu on hooreejo, o yi'ii ko wuttoobe ceri ɓen^t e jamaa on woni e nder jiiboldu kon, ²⁴ o wi'i ɓe: «Pottitee, jiwo on maayaali, o daani.» Be jali mo. ²⁵ Bay wonii jamaa on yaltinaama, onsay o naati, o nangi jungo jiwo on, jiwo on immii. ²⁶ Fii dñun andii e leydi ndin fow.

Fii no Iisaa Wuntiniri Bumbe Dido

²⁷ Wa ko Iisaa iwata don, bumbe dido jokki mo, no ewnoo wi'a: «Yurmínee men, yo bii Daawuuda!»

²⁸ Bay o hewtii ka suudu, bumbe ɓen badii mo. Iisaa wi'i ɓe: «Hidon sikka mido waawi wadude dñun?»

Be jaabii mo: «Hiiyii, yaa an Koohoojo.»

²⁹ Onsay o meemi ɓe gite den, o wi'i: «Yo dñun woniran on wano gomdinirdon non.»³⁰ Gite mabbe den wunti. Iisaa yamiri ɓe dñundoo, o sattini, o wi'i: «Reenee wota gooto andu.»³¹ Kono nde ɓe yaltirnoo, ɓe nangi e fillagol e nder leydi ndin fow ko Iisaa wadani ɓe kon.

^t9.23 E naamu Yahuudiyankeebé ɓen, si goddo maayiino ko wuttoobe ceri ɓen e rewbe toddaaabe fii wullugol noddetenoo fii ko wulla maydo on.

Fii no Iisaa Selliniri Mboboojo mo Jinna Nangi

³² Wa ko Iisaa e taalibaabe mun ɓen fokkitata, ɓe addani mo mboboojo mo jinna nangi. ³³ Bay wonii jinnawii ngin radaama, mboboojo on wowli. E nder ko jamaa on ɣaldi kon, ɓe wi'i: «Haa hande sifa dun yi'aaka e leydi Isra'iila ndin!»³⁴ Kono Fariisiyaabe ɓen kajun wi'i: «Ko tippude e lando jinnaaji din o woni radorde jinnaaji din.»

Fii no Iisaa Yurmiraajamaa on

(Mrk. 6.34; Luk. 10.2)

³⁵ Tawi Iisaa no yiilotonoo e ca'e den fow e kodooli din, janna ka nder juulirde mabbe, waajoo fii Kibaaru Moyyo *laamu Alla ngun, ɣawnda kadi kala nawnaaje e nabbeeli. ³⁶ Bay o yi'ii jamaa on, o yurmaa, ko fii hari hibe aybi, hibe ɣakkiraa ballo wa baali di alaa ngaynaako. ³⁷ Onsay o wi'i taalibaabe makko ɓen: «Baagol ngol no duudi, kono wa'oobe ɓen duudaa. ³⁸ Awa jooni, toree non Jom baagol ngol yo o addu wa'oobe ka baagol makko.»

Fii no Iisaa Nuliri Sahaabaabe mun ɓen Sappoo e Dido

(Mrk. 3.13-19; Luk. 6.12-16)

10¹ Bawto dun, Iisaa noddi *sahaabaabe makko ɓen sappoo e dido, o okki ɓe bawgal radagol jinnaaji din e sellingol kala ɣaw e kala nawnaare. ² E hino inde ɓen sahaabaabe sappoo e dido: arano on e mabbe ko Sim'uunu, jammaado on Petruusu, e Andaraawu neene-gooto makko on, e Yaaquuba mo Zabadii, e Yuuhanna neene-gooto on on, ³ e Filiipu e Bartolomaawu e Tooma e Matta, yantaynoodo sagalle on, e Yaaquuba mo Alfaa, e Taddaawu, ⁴ e Sim'uunu tawdaado e fedde *Zelotiiɓe ɓen, e Yudaasi Iskariiyu, janfoytoodo mo on.

⁵ Ko ɓee sappoo e didoobe doo Iisaa immini ɓawto o yamirde ɓe dundoo: «Wota on yaaru ka ɓe wonaa Yahuudiyanke ɓen e wota on naatu ka ca'e

Samariyankeebe ben.⁶ Kono yaaree ka baali suudu *Isra'iila majjudi din.⁷ E nder yaadu mon ndun, waajodon wonde laamu kammu ngun badike.⁸ Nawndon jnawbe ben, immintinon maybe ben, sellinon be damajan ben, be laaba, radodon jinnaaji din. On hendike dun e hoore on ittaa hay huunde, onon kadi okkee dun, hara on ittinaali hay huunde.⁹ Wota on datto kajye maa kaalisi maa sila, yoobodon,¹⁰ maa bonfo fii yaadu ndun, maa dolokkaaji didi, maa pade, maa tuggordu. Ko fii golloowo no handi e jaametee mun.

¹¹ «Kala saare maa hodo ka naatudon, andee si tawii no woodi don godđo hebuliido jabugol on, haray weeree ka makko haa nde hidon yaha.¹² Nde hidon naata e suudu, salminee.¹³ Si yimbe ndun suudu jabii on, haray yo buttu mon on wonu e mađbe, kono si tawii be jabaali on, haray yo buttu mon on artan on.¹⁴ Si tawii non on jabaaka, maa kongudi mon din hedaaka, haray yaltee e ndun suudu maa e nden saare, honkon mbullaari teppe mon ñen.¹⁵ Ka haqiiqa mi andinii on, jnande jaawoore nden ko dee ca'e Saduumma e *Amuura buretee hoynaneede edii nden saare don.

¹⁶ «Jooni mido imminirde on wa baali e hakkunde caapaali, awa reenoree wa mboddi, neworon wa gabooji.¹⁷ Reenodon e yimbe ben, ko fii be naboyay on ka jaawirdi, be foccoya on ka juulirde mađbe.¹⁸ On nabete ka yeesoobe ben e ka lambe ben sabu an, seeditodon fii an yeeso mađbe, kambe e be wonaa Yahuudiyanke ben.

¹⁹ «Kono tuma be watti on e joge, wota on jiboyo ko honno haalirton maa ko wi'on. Ko fii ko wowloyton kon longinte on e on saa'i tigi.²⁰ Ko fii wonaa onon yewtoya, kono ko Ruuhu Ben mon on yewtiroyta on.²¹ Ko fii godđo yettoyay musiddo mun, watta mo e joge fii yo o ware, baabaajo kadi warra non biddo mun. Faybe ben kadi hawtanoyoo mawbe mun ben, be wona sabu haa be waree.²² Fow ajoyay on sabu innde an nden. Kono mo ñajjike dun haa ka lannoode, o dandoyte.²³ Kono si on cukkaama e ndee saare doo, dogee yaaron e wonnde goo.

Ko fii ka haqiiqa mi andinii on, on waawataa yahude e ca'e Isra'iilayanke den fow ado *Bii-Aaden on arude.

²⁴ «Awa taalibaajo buraa karamoko mun, wano non kadi kurkaadu buraa jeydo dun. ²⁵ Yonanii taalibaajo ka o wa'a wa karamoko makko, kurkaadu ndun kadi wa'a wa jom mun. Si ɓe jammii non jom suudu ndun *Balzabuula, haray ko haa honto non ɓe jammata yimɓe suudu makko ndun!

²⁶ Awa wota on hulu ɓe few, ko fii alaa ko suudii ko feenataa, awa kadi alaa gundoo mo andotaako. ²⁷ Ko mi wowlani on kon ka niwre, fejninee dun tumbere jalorma. Ko sowndadon kon kadi, ewnee dun ka warŋakke. ²⁸ Awa wota on hulu waroofe bandu ɓen, hara waawataa warude wonkii. Kono hulee waawudo mulude wonkii e bandu on ka jahannama. ²⁹ Hinaa seresereeji didi no yeeyee tammaaru wooturu? Kono hay wooturu yanataa e leydi e ɓaawo muyde Ben mon. ³⁰ Onon e hoore mon, hay cukuli ko'e mon den fow no limaa. ³¹ Awa, wota on hulu, ko fii hidon buri seresereeji buy hittude ka Alla.

³² «Ko dun wadi, kala qirritido fii an yeeso yimɓe ɓen, min kadi mi qirritoyto fii makko yeeso Ben an Wondo ka kammu on. ³³ Kono kala yeddudo fii an yeeso yimɓe ɓen, min kadi mi yeddayay fii makko yeeso Ben an Wondo ka kammu on.

³⁴ «Wota on sikku ko addugol buttu e oo aduna mi arani. Wonaa buttu mi addi, kono ko kaafa. ³⁵ Ko mi arani ko liddondiral: gorko e ben mun liddondira, jiwo e yumma mun liddondira, jiwo e esiraawo mun debbo liddondira. ³⁶ Yimɓe suudu ontigi ndun wona ayɓe makko.

³⁷ «Kala yidudo ben mun maa yumma mun buri lan min, haray ontigi foddaa e an. Kala yidudo kadi ɓiddo mun gorko maa ɓiddo mun jiwo buri lan, haray ontigi foddaa e an. ³⁸ Kala mo y'ettaali leggal mun altindiraangal* ngal, jokkimmi, haray

ontigi foddaa e an.^{u39} Kala faalaado dandude ngurndan mun dan, dan hayriray mo, kala non mo ngurndan mun dan hayrira sabu an min, o hettoyay dan.

⁴⁰ «Kala jabudo on haray jabii lan, kala non jabudo lan haray o jabii Nuludo lan on. ⁴¹ Kala jabudo annabaajo sabu on ko annabaajo, o hebay mbarjaari annabaajo. Kala jabudo feewudo sabu on ko feewudo, o hebay mbarjaari feewudo. ⁴² Ka haqiiqa mi andinii on, kala okkordo goddo e koy taalibahoy an ndiyan buubudan, sabu kun ko taalibahun an, o fadataa mbarjaari makko ndin few.»

Fii Lande Yaaya den

(Luk. 7.18-35)

11 ¹ Bay wonii Iisaa gaynii yamirde *sahaabaabe makko ben sappoo e dido, o iwi don, o yahi e ca'e diiwal ngal fii jannugol waajoo.

² Fewndo Yaaya woni ka nder kaso, o nani fii kuude *Almasiihu on no wowlee. Onsay o immini taalibaabe makko ben ³ ko landoyoo mo, wi'a: «Taw si ko onon woni haanudo arude on, kaa hara yo men habbo goddo goo?»

⁴ Iisaa jaabii be wi'i: «Yahee fillitanodon Yaaya ko yi'udon kon e ko nanudon kon, ⁵ wonde: bumbe ben yi'ii, boofoobe ben yahii, be damajan ben sellinaama laabii, pahidube ben nanii, maybe no immintineede, Kibaaru Moyyo on no fejjinaneede miskinbe ben. ⁶ Kala mo feggaaki e an ko malaado.»^w

⁷ Bay be yiltitike, onsay Iisaa fuddii yewtude jamaa on fii Yaaya, o landii be dundoo, o wi'i: «Ko hondun yahunodon ndaaroygol ka wulaa? Hara ko kudol ngol hendi ndun dimbata? ⁸ Kaa ko hondun yahunodon ndaarugol? Ko neddo borniido conci dimi? Ndaaree, bee borniibe conci dimi no e nder galleeji laamu. ⁹ Ko

^{u38} 10.38 «Yettugol leggal mun altindiraangal ngal» ko hebilagol jokkugol Iisaa haa maaya.

^w 11.6 Maa: «Kala mo ronkaali gomdinide lan ko malaado.»

hondun non yahunodon ndaarugol? Ko annabaajo? Hiiyii, min mi wi'ay on, ko ko buri annabaajo.¹⁰ Ko oo doo woni mo fii mun windii on, wonde:

«Awa, mido imminde nulaado an on yeeso maa,
fii ko fertano-maa laawol maa ngol.»^y

¹¹ «Ko fii ka haqiiqa mi andinii on, alaa mo suddiido jibini burdo Yaaya
*lootoowo maande tuubuubuyee on. Kono non burdo fandude on ka laamateeri
kammu no buri mo teddude.¹² Gila e Yaaya lootoowo maande tuubuubuyee on
haa hande laamu kammu ngun no yaarude yeeso e nder doole, tawi dooloobe ben
no etaade fii halorgol ngu.¹³ Ko fii ko haa e Yaaya annabaabe ben fow e Sariya on
haalunoo ko Alla longini fun.¹⁴ Si hidon faalaa jabude fun, ko kanko woni liliya,
on haanunoodo arude.¹⁵ Mo no mari noppi yo nanu!

¹⁶ «Hara ko e hondun mi ebbindirta nguu jamaanu? Hingu nandi e faybe,
joodiibe e kubitirde, hara ben no noddindira, wi'a:¹⁷ «Men wuttanii on ceri, on
amaali, men yimanii on gimdi yurmudi, on wullaali!»¹⁸ Ko fii Yaaya arno, o
naamataano, o yarataano ko mandilinta, wi'udon: «On ko mo jinna!»¹⁹ Bii-Aaden*
on kadi arii no jaama no yara, wi'udon: «On ko reeredudo, yaroowo, weldudo e
yantoobe sagalle e junuubanke'en!» Kono kuude faamu Allaahu on den hollay
wonde ko ngu feewungu.»

Fii Ca'e Saliide Gomdinide den

(Luk. 10.12-15)

²⁰ Onsay Iisaa woni e felugol ca'e de o buri wadude kaawakeeji moyýí e mun den,
sabu ko de tuubaali kon,²¹ o wi'i: «Bone wonanii ndee saare Kuuraziin e ndee
saare Bayti-Sa'iida! Ko fii si tawno dii kaawakeeji moyýí wadunoodi ka mon ko
non wadirnoo e dee ca'e Tiiri e Siduuna, harayno neebii ko jeyaabe e den ca'e
bornii conci heynordi, be wujitii ndoondi fii hollugol wonde be tuubii.²² Ko fun

^y11.10 Mal. 3.1

wadì si mi wi'ay on, nande jaawoore nden ko Tiiri e Siduuna buretee hoynaneede edii onon.²³ Onon non, bee 6e Kafernahuum, hidon sikka fii mon bantete haa ka aljanna? Oo'o, on bugete ka jahannama. Ko fii si tawno dii kaawakeeji moyfí wadudi e maa wadirno non e ndee saare wi'eteende *Saduma, harayno haa hande hinde woodaa.²⁴ Ko dun wadì si mi wi'ay on, nande jaawoore nden ko ndee saare Saduma buretee hoynaneede edii ndee saare doo.»

Fii no Iisaa Noddiri en e Makko

(Luk. 10.21-22)

²⁵ E on saa'i don, Iisaa yetti haala kan, o wi'i: «Mi yettii ma yo Baaba, Jom leydi e kammu, fii koo ko wirnandaa dun ben faamube e bee gandidube, fejnjinandaa dun bee faybe.²⁶ Hiiyii, ko fii ko dun wonnoo yidi maa on, yo Baaba.

²⁷ «Awa, Baaba an wattii fow e juude an. Awa kadi hay gooto andaa Biddo on si hinaa Baabaajo on, wano tawiri non kadi hay gooto andaa Baabaajo on si hinaa Biddo on e on mo Biddo on faalaa mo fejnjinande.

²⁸ «Aree e an, on fow, yo rondiibe ko teddi haa ronki, mi fowntina on.²⁹ Jabon yankinanagol ko mi fawi on kon, jabon janndeeji andin. Ko fii min ko mi newiido, yankiniido kadi e bernde, dun on hebay fowntunde fii wonkiji mon din.³⁰ Ko fii ko mi fawata on kon no weli nabude, awa dongal ngal mi fawata on ngal ko hayfungal.»

Landal fii Nalaande Fowteteende nden

(Mrk. 2.23-28; Luk. 6.1-5)

12¹ E on saa'i don, tawi Iisaa no rewude e gese ngawri nande aseweere nden, dun ko *nalaande fowteteende nden. Tawi taalibaabe makko ben no woocora cawti den gese, worsa dì naama, ko fii hari hibe weelaa.² Bay *Fariisiyaabe ben yi'ii dun, be

wi'i mo kanko Iisaa: «E hino taalibaabe maa ben no wadude ko dagaaki e nalaande fowteteende nden!»

³Kono Iisaa jaabii be, wi'i: «Hara on jangaali ko Daawuuda wadunoo kon fewndo o weelaa, kanko e yimbe wondunoobe e makko ben? ⁴O naati ka nder suudu Alla, onsay be jaami bireedijje weebitaade fii sadaka den, de tawata hinaa kanko, hinaa be o wondunoo ben daganinoo jaamugol, kono ko *yottinoobe sadaka ben tun daganinoo jaamugol de. ⁵Kaa on jangaali ka Sariya wonde e aseweeje den hooreebe yottinoobe sadaka ben no bona Sariya nalaande fowteteende nden ka nder *juulirde mawnde, hara fawaaki be? ⁶Kono mi andinii on, burdo juulirde mawnde nden no doo. ⁷Allaahu on no daali: <Ko yurmeende mi faalaa, wonaa sadaka.»^y Si hidon andunoo ko dun firi, on felataano yimbe be bonnaa. ⁸Ko fii ko *Bii-Aaden on woni jom nalaande fowteteende nden.

Fii no Iisaa Selliniri Maaya-Jungoojo

(*Mrk. 3.1-6; Luk. 6.6-11*)

⁹Onsay o iwi don, o naatoyi ka nder juulirde mabbe. ¹⁰Tawi maaya-jungoojo no nder ton. Nde tawnoo hibe faalaa toonude Iisaa, be landii mo, be wi'i: «E hara no dagii ka goddo jawndee e asewe?»

¹¹O jaabii be, o wi'i: «Ko hombo e mon, si no mari baalii gootii, ngin ara e yanude e ngayka e aseweere, hara o ronkay ngii nangude, yawna? ¹²E ko haa honto non neddo hitti buri baalii! Awa no dagii wadugol ko moyyi jnande nalaande fowteteende nden.»

¹³Onsay o wi'i on neddo: «Fontu jungo maa ngon.» On fonti ngo, ngo selliri wa ngoya. ¹⁴Onsay Fariisiyaabe ben yalti, fewjodi no be warira mo.

^y12.7 Hus. 6.6

Fii Kurkaadu ndu Alla Subii ndun

¹⁵ Bay Iisaa faamii nden ebboore mabbe, o iwi don. Buy jokki mo, o sellini be fow. ¹⁶ O yamiri be wota be fejjin fii makko, ¹⁷ fii no ko daaliranoo annabi Isaaya kon laatora, wonde:

¹⁸ «E hino kurkaadu an ndu mi subii ndun,

on yidaado an mo mi weltori.

Mi waday Ruuhu an on e makko,

o fenjinanoya leyýí din peewal ngal.

¹⁹ O yeddondiroytaa e goddo, o sonkoytaa,

e hay gooto nanoytaa hito makko ka ballanje.

²⁰ O heloytaa kudol bayýungol,

o roccinoytaa sarbu wondo e suurude,

haa o folna peewal ngal.

²¹ Onsay leyýí din tanyinoroyay innde makko nden.»^z

Fii no Iisaa Jaabori Toone de O Toonaa

(*Mrk. 3.22-30; Luk. 11.14-23*)

²² Bawto dun be addani mo mo jinna nangi, tawi on ko mboboojo bundo, o sellini mo. Onsay on mboboojo wowli, yi'i. ²³ Tawi dun no ñaldini jamaa on fota, be wi'i: «Taw si ko oo woni *Almasiihu mo Daawuuda?»

²⁴ Bay Fariisiyaabe ben nanii dun, be wi'i: «Oo neddo ko e innde *Balzabuula lando jinnaaji din tun o woni radorde jinnaaji din!»

²⁵ Nde tawnoo Iisaa no andi ko be miijii, o wi'i be: «Kala laamateeri liddondirndi, kayri tigi ndi caabay. E kala saare maa suudu, si liddondirii kapun tigi, haray waawataa tabitude. ²⁶ Si tawii non Ibuliisa radike Ibuliisa, o liddike hoore makko

^z12.21 Isa. 42.1-4

kanko tigi. Haray ko honno laamateeri makko ndin tabitirta? ²⁷ Si tawii non min ko tippude e Balzabuula mi woni radorde jinnaaji din, haray be mon ben non ko tippude e hombo woni di radorde? Ko dun wadi si kambe tigi be naawoyay on.

²⁸ Kono si tawii ko tippude e Ruuhu Alla on mi woni radorde jinnaaji din, haray *laamu Alla ngun arii haa e mon.

²⁹ «Maa ko honno goddo waawirta naatude e nder suudu neddo dolnudo, mooba keyeeji on din, ado o habbude on neddo dolnudo taho. Ko onsay doo o waawata moobude ko woni ka suudu on kon. ³⁰ Awa, kala mo aldaa e an haray ko gano an, awa kadi kala mo wallataa lan moobitude haray ko saakoowo.

³¹ «Ko dun wadi si mi wi'ay on, kala junuubu maa hoyre yaafante yimbe ben, kono hoyre hoynudo Ruuhu Alla on yaafetaake few. ³² Kala wowludo Bii-Aaden on ko boni, no ara ka yaafanee. Kono kala wowludo *Ruuhu Seniido on ko boni, o yaafantaake e oo aduna fewndiido doo, e aroyoowo on kadi.»

Misal Yettaangal e Leggal e Bibbe Mun

(Luk. 6.43-45)

³³ «Si leggal no moyyi, haray bibbe maggal on no moyyi. Si leggal moyyaa, haray bibbe maggal on moyyaa. Ko fii leggal kala no anditiree bibbe mun ben. ³⁴ Ko onon yo iwdi kuura! Ko honno wowlirton ko moyyi, hara ko on bonbe? Ko fii ko ko heewi e bernde woo hunduko wowlata. ³⁵ Neddo moyyo on yaltinay moyyere ka moyyuki mun, neddo bondo on kadi yaltina bonki ka bonki mun. ³⁶ Awa mi andinii on, nande naawoore nden yimbe ben hasborte kala kongudi mehi di be wowlaynood. ³⁷ Ko fii ko kongudi maa din naawirtedaa feewudo maa bondo.»

Fii no Iisaa Tororaa Wadugol Maande

(*Mrk. 8.11-12; Luk. 11.29-32*)

³⁸ Onsay wobbe e jannoobe fii Sariya on e Fariisiyaabe ɓen yetti haala kan, wi'i:
«Karamoko, meden faalaa yo a wadan men maande hawniinde, men yi'a.»

³⁹ O jaabii ɓe, o wi'i: «Jamaanu bonngu jinoowu no dabb̄a maande, kono ngu
jonnetaake maande si hinaa sifa ndee nde annabi Yuunusa. ⁴⁰ Ko fii ko wano
Yuunusa wonirnoo ka nder reedu lingii njanii ngin non balde tati^a, ko wano non
Bii-Aaden on wonirta ka nder leydi balde tati. ⁴¹ Awa kadi nande jaawoore nden,
nde yimbe nguu jamaanu doo no jaawee woo, yimbe *Niinawa ɓen kadi
immoyto, jaawoya ɓe sabu kon ko ɓe hedino ngun waaju Yuunusa, ɓe tuubi,
hara-le burdo Yuunusa no doo. ⁴² Nande jaawoore nden, nde yimbe nguu
jamaanu doo no jaawee woo, onsay oo debbo laaminoodo ndii leydi hikkorndi ka
sengo jaamo immoyto, jaawoya ɓe sabu iwugol mo haa ka kattudi leyde, ara
heditoo ngun faamu Sulaymaana, hara-le burdo Sulaymaana no doo.

⁴³ «Nde jinnawii yalti e neddo woo, ngii hammiray ka wulaa, hara hingii dabb̄a
nokkuure fowtorde. Si ngii tawii ngii hebaali, ⁴⁴ ngii wi'ay: ‹Yo mi yiltito ka suudu
ka mi iwnoo don.› Nde ngii hewtiti, ngii tawa ndun suudu fittaama labbinaama.

⁴⁵ Onsay ngii yahay, ngii dabb̄oya jinnaaji jeedidi burdi ngii hunyude, di naata
don, di hoda. Onsay sakkitorde on neddo buray aranun dun bonude. Ko wano non
woniranta nguu jamaanu bonngu.»

Fii Beynguure Iisaa nden

(*Mrk. 3.31-35; Luk. 8.19-21*)

⁴⁶ E nder ko Iisaa yewtata jamaa on kon, tawi yumma makko e yumma-gootoobe
makko ɓen no darii ka yaasi, no faalaa yiidude e makko. ⁴⁷ Onsay goddo wi'i mo:

^a12.40 Yun. 1.17

«Yumma mon e yumma-gootoobé mon ɓen no darii ka yaasi, hibe faalaa on yewtude.»

⁴⁸Kono Iisaa jaabii mo, wi'i: «Ko hombo woni yumma an e ko hombe woni yumma-gootoobe an ɓen?»⁴⁹Onsay o sappii taalibaabe makko ɓen, o wi'i: «E hino yumma an e yumma-gootoobe an ɓen.⁵⁰Ko fii kala wadudo faale Ben an Wondo ka kammu on, haray ko on woni yumma-gooto an on e bandiraawo an on e yumma an.»

Misal Yettaangal e Remoowo

(Mrk. 4.1-20; Luk. 8.4-15)

13¹Nden jande Iisaa yalti ka suudu, o joodoyii ka daande weendu. ²Hakkee ko jamaa moobinoodo takko makko on duudi, o bakii e laakun, o joodii, tawi jamaa on fow kajun no ka daande weendu. ³O yewtiri be piiji buy mise, o wi'i: «Ko remoowo yaltunoo sankugol. ⁴E nder ko o sankata kon, gabbe goo yani ka fatal, colli din ari modi de. ⁵Godde den yani e hoore kaaye, ka leydi duudaa. De fudi heja sabu dewlugol leydi ndin. ⁶Bay naange ngen yaltii, de sumi, de yoori, sabu angal ka dadii din sijoo. ⁷Godde goo kadi yani ka sooyoore, de fusidi e mayre, sooyoore nden modi de. ⁸Godde goo yani ka leydi moyyiri. De fudi, de rimi, cawti goo gabbe teemedere, cawti goo gabbe cappande jeegoo, cawti goo gabbe cappande tati. ⁹Mo no mari noppi yo nanu!»

¹⁰Onsay taalibaabe ɓen badii mo, wi'i: «Ko fii hondun yewtiranton be mise?»

¹¹Iisaa jaabii be, wi'i: «Onon on yedaama andugol gundooji laamu kammu ngun, kono kambe be yedaaka dun. ¹²Ko fii ko mardo beydantee haa duuda, kono mo maraa on jabitante hay yero ko o mari kon. ¹³Ko wadi si mido yewtirde be mise, ko bay hibe ndaara, kono be yi'ataa, hibe jentoo, kono be nanataa, be faamataa.

¹⁴Fii ko Alla longinnoo Isaaya kon no laatora e mabbe, wonde:

«Pellet hidon nana,

kono on faamataa few.

Pellet hidon ndaara,

kono on yi'ataa few.

¹⁵ Ko fii dee berde oo jamaa wonii yoorude.

Be uddii noppi mabbe din,

awa kadi be ombii gite den,

sakko be yiira gite mabbe den,

maa be nanira noppi mabbe din,

maa be faamira berde mabbe den,

haa be tuuba, mi sellina be.»^b

¹⁶ «Onon non, gite mon den malii ko fii hide yi'ude, noppi mon din malii ko fii hidî nanude. ¹⁷ Ko fii ka haqiiqa mi andinii on, annabaabe e feewube buy faalano yi'ude koo ko wondon yi'ude, kono be yi'aali. Be faalano kadi nanude koo ko wondon nanude, kono be nanaali.

¹⁸ «Kono onon, hedee firo ngal misal remoowo on. ¹⁹ Nde goddo hedii daalol *laamu Alla ngun, ronki ngol faamude, bondo on aray, itta ko aawaa kon ka bernde makko. Dun no wa'i wa nde awdi sankandi ndin saami ka datal. ²⁰ Nde awdi sankandi ndin saami ka kaayé, dun no wa'i wa nde goddo nani daalol ngol, o jaba ngol heja e nder weltaare. ²¹ Kono o alaa dadî, ko fii hinaa o tabitudo. Nde satteendeeji maa cukkeede aroyi sabu jokkugol makko daalol ngol, o tertoto kisan. ²² Nde awdi sankandi ndin saami ka sooyoore, dun no wa'i wa nde goddo nani daalol ngol, hara ngol rimataa e makko ko fii haray ngol modiraama anndeeji aduna e dayniro jawle. ²³ Nde awdi sankandi ndin saami ka leydi moyyiri, dun no wa'i wa nde goddo nani daalol ngol, faami, ngol rimi e makko,

^b13.15 Isa. 6.9-10

wobbe ben laabi teemedere, wobbe ben laabi cappande jeegoo, beya ben laabi cappande tati.»

Misal Yettaangal e Gajo Sankoowo Kenkesama

²⁴ Iisaa addani ɓe misal goo kadi, o wi'i ɓe: «Laamu kammu ngun no wa'i wa nde aaden sanki awdi moyýiri e ngesa mun. ²⁵ Kono wa ko yimɓe ben daanii, gajo makko on ari, sanki kenkesama ka ngesa makko ngawri, o yahi. ²⁶ Bay wonii ngawri ndin fudii haa mawnii sawtii, kenkesama on kadi yaltiti.

²⁷ «Kurkaaduube jom suudu ndun ari, wi'i mo: <Jom amen, e hinaa awdi moyýiri sankudon ka ngesa mon? E hara ko honto oo kenkesama iwri?>

²⁸ «O jaabii ɓe, o wi'i: <Ko gajo wadi dün.>

«Onsay kurkaaduube ben wi'i mo: <Hidon faalaa yo men yahu men boroya dün?>

²⁹ «O jaabii ɓe: <Oo'o, fii wota on boror ngawri ndin nde hidon bora kenkesama on. ³⁰ Accee di njandida haa ka baagol. Si baagol ngol fewndike, mi wi'ay wa'ooɓe ben yo ɓe boru taho kenkesama on, ɓe habbirba'e ba'e fii ko sunnee, ɓe mooba ngawri ndin ka tumusuuje an.»»

Misal Yettaangal e Abbere Bene

(*Mrk. 4.30-32; Luk. 13.18-19*)

³¹ Iisaa addani ɓe misal goo kadi, o wi'i ɓe: «Laamu kammu ngun no wa'i wa abbere bene, nde goddo yetti, aawi e ngesa mun. ³² Pellet, ko nden buri fandude e ko aawetee kon fow, kono nde nde fudi, haray ko nden buri mawnude kala ko tutetee e naakoo, nde wonta leggal haa ka tawata colli din ka weeyo aray, hoda e caldi maggall on.»

Misal Yettaangal e Lewen

(Luk. 13.20-21)

³³ Iisaa addani ɓe ngal misal doo kadi, o wi'i ɓe: «Laamu kammu ngun no wa'i wa lewen mo debbo yetti, jillindiri e sariyaare tati condi farin, o piya dun, on lewen wona sabu dun fow yura.»

³⁴ Iisaa yewtiri dun jamaa on mise. O yewtirtaano ɓe si wonaa mise, ³⁵ fii no ko daaliranoo annabaajo on kon laatora, wonde:

«Mi udditay hunduko an kon fii yewtirgol mise,
mi fejjnina piiji suudinoodi gila ka fuddoode.»^c

Firo Misal Yettaangal e Kenkesama

³⁶ Onsay Iisaa acci don jamaa on, o naati ka suudu. Taalibaabe makko ben badii mo, ɓe wi'i: «Sifanee men ngal misal kenkesama ka ngesa.»

³⁷ O jaabii ɓe, o wi'i: «Sankudo awdi moyíri on ko *Bii-Aaden on. ³⁸ Ngesa mban ko aduna on. Awdi moyíri ndin, ko ben woni bibbe laamateeri ndin. Kenkesama on non ko ben woni bibbe bondo on. ³⁹ Gano sankudo kenkesama on, ko on woni ibuliisa. Baagol ngol non ko lannoode aduna on, wa'ooбе ben ko ben woni malaa'ikaabe ben. ⁴⁰ Wano kenkesama on borirtee non fii bugebol ka yiite, ko non wonirotya nde aduna on lanni. ⁴¹ Bii-Aaden on imminoyay malaa'ikaabe mun ben ko suuta e nder laamateeri makko ndin fegginayɓe ben fow e wadoobe ko boni ben, ⁴² ɓe bugoo ɓe ka nder beembal yiite ka wullaandu e ɻatindiro jiiyé woni ton. ⁴³ Kono feewube ben jalbiroyay wa naange ka nder laamateeri Ben mabbe. Mo no mari noppi, yo nanu!»

^c13.35 Zab. 78.2

Mise Ebbindiraadé e Laamu Alla ngun

⁴⁴ Iisaa wi'i kadi: «Laamu kammu ngun no wa'i wa keyee suudiido e nder ngesa mo neddo goo arata yi'a suuda. E nder weltaare makko nden o yaha, o yeeya kala ko o jogii, o sooda mban ngesa.

⁴⁵ «Laamu kammu ngun no wa'i kadi wa njulaajo wondo dabbude lambiri. ⁴⁶ Bay o yi'ii satta-cogguure, o yahi, o yeeyiti kala ko o jeynoodi, o soodi nde.

⁴⁷ «Laamu kammu ngun no wa'i kadi wa *jalaaji bugaadi e nder maayo, moobi noone liyí fow. ⁴⁸ Bay di heewii, di poodaa ka pencen, joodaa. Moyí din yettaa wattaa ka miranji, bondidin bugaa. ⁴⁹ Ko non kadi wonirotya nde aduna on lanni. Malaa'ikaabe ben yahoyay sendindira bonbe ben e moyúube ben. ⁵⁰ Be bugoo bonbe ben ka beembal yiite ka wullaandu e ɣatindiro ɣiiyé woni ton.

⁵¹ «E hara on faamii dun fow?»

Be jaabii: «Hiiyii!»

⁵² O wi'i ɓe kadi: «Ko dun wadi, kala jannoowo jamaa on fii Sariya on, si no jannaa fii laamu kammu ngun, no wa'i wa nde jom suudu no yaltina e nder marga mun keyeeji kesi e kiddi.»⁵³ Bay wonii Iisaa gaynii dee mise, o iwi don.

Fii no ɓe Naasirata ɓen Yawori Iisaa

(Mrk. 6.1-6; Luk. 4.16-30)

⁵⁴ Iisaa yahi ka o ne'aa don, dun ko Naasirata, o woni e waajagol ka nder juulirde mabbe. Dun ɣaldini ɓe haa ɓe wi'i: «Ko honto nguu faamu e dii kaawakeeji moyí iwrani mo? ⁵⁵ E hinaa biddo minisiyeejo on nii? Hinaa yumma makko wi'etee Mariyama? E hara neene-gootoobe makko ben hinaa Yaaquuba e Yuusufu e Sim'uunu e Yuudu? ⁵⁶ E hinaa bandiraabe makko ben fow no wondi e men? E hara ko honto dun fow iwrani mo?»⁵⁷ Dun hadi ɓe gomdingol mo.

Kono Iisaa wi'i be: «Annabaajo ko ka leydi mun tun e ka beynguure mun yawaa.»⁵⁸ Laatii o wadaali don kaawakeeji moyýi buy sabu angal gomdinal mabbe ngal.

Fii no Yaayaa Wariraa

(*Mrk. 6.14-29; Luk. 9.7-9*)

14

¹Ko e on saa'i don, *Heroodu lando diiwal Jaliilu ngal nani fii Iisaa no wowlee. ²O wi'i kurkaaduube makko ɓen: «Ko Yaayaa lootaynoodo maande tuubuubuyee on nii! O immitike e hakkunde maybe ɓen! Ko dun wadi si himo mari bawgal wadugol kaawakeeji moyýi!»

³Ko Heroodu wi'rnoo dun ko bay hari o nangiino Yaayaa, o jolkii mo, o wadii e kasoo sabu oo debbo wi'eteedo Heroodiiya, beyngu Filiipu, yumma-gooto makko on nun kanko Heroodu, ⁴ko fii hari Yaayaa wi'ii mo kanko Heroodu wonde daganaaki mo ka o yetta on debbo. ⁵O faalaa mo warude, kono o huli jamaa on, ko fii hari hibe jogori Yaayaa wa annabaajo.

⁶Kono e nder nalaande anditugol jibineede makko nden kanko Heroodu, jiwo Heroodiiya on ami e hakkunde saatinaabe ɓen. Dun weli Heroodu ⁷haa o fodi on jiwo e hoore woondoore wonde o wadanay mo kala ko o torii mo fewndo don.

⁸Tippude e ko yumma makko kanko jiwo on lowi mo kon, on jiwo wi'i: «Jonnan doo hoore Yaayaa lootoowo maande tuubuubuyee on nden, hara hinde tumbaa e miran.»

⁹Onsay lando on aani. Kono sabu woondooje makko ɗen, e ɓe o saatinnoo ɓen, o yamiri yo nde jonne mo. ¹⁰O immini ko tayo ya hoore Yaayaa nden ka kasoo, ¹¹nde addaa e miran, dun jonnaa jiwo on, kanko kadi o nabani nde yumma makko.

¹²Onsay taalibaabe Yaayaa ɓen ari, yetti furee makko on, surroyi. Be yahi, ɓe humpitoyi Iisaa.

Fii no Iisaa Namminiri Yimþe Guluuje Njowo

(*Mrk. 6.30-44; Luk. 9.10-17; Yhn. 6.1-14*)

¹³ Bay Iisaa nanii dun, o iwi don e laana ndiyan, kanko tun o yahi e nokkuure wuldinnde. Jamaa on humpitii dun, þe iwi ka ca'e, þe seppi, þe jokki mo. ¹⁴ Bay o iwii ka laana, o yi'i jamaa moolanaado, o yurmaa þe, o jawndi jawþe wonnooþe don þen.

¹⁵ Bay nibbii, taalibaabe þen badii mo, wi'i: «Doo ko nokkuure wuldinnde nii, nallal ngal poodike. Accitee jamaa on, þe yaha ka kodooli, þe dabba ko þe jaama.»

¹⁶ Iisaa jaabii þe, wi'i: «Jaraa ka þe yaha. Onon tigi okkoree þe ko þe jaama.»

¹⁷ Kono þe wi'i mo: «Ko bireedijje jowi e liyþi didi pet men mari doo!»

¹⁸ Kanko kadi o wi'i þe: «Addanee lan dundoo.» ¹⁹ Onsay o yamiri jamaaji din yo þe joodo ka hudo. O yetti bireedijje ðen jowi e liyþi din didi, o banti gite ðen, o fewtini ka kammu. O du'ii, o tayþi bireedi on, o jonni taalibaabe þen, taalibaabe þen hewtini jamaa on. ²⁰ Fow jaami haa haari. Be moobiti debeeje sappoo e didi tew kunte ko lutti. ²¹ Tawi þen jaamube ko wa þe worbe guluuje njowo, hara rewþe e fayþe lintaaka.

Fii no Iisaa Seppiri ka hoore Ndiyan

(*Mrk. 6.45-52; Yhn. 6.16-21*)

²² Bawto dun kisan, Iisaa yamiri taalibaabe mun þen yo þe bako ka laana, þe hikkoo yeeso makko, þe lumba gada fewndo o yiltata jamaa on. ²³ Bay wonii o yiltii þe, o yawi ka fello fii juulugol toroo ka weddii. Bay nibbii, tawi ko kanko tun woni don. ²⁴ Tawi laana kan wodditorii leydi ndin wa palande teemedde, awa kadi morloode ndiyan dan no piyaade e makka, ko fii hari hika tiindondiri e hendu ndun.

²⁵ Ka subaka, Iisaa sutori e mabbe, himo seppa ka hoore ndiyan. ²⁶ Bay taalibaabe ben yi'ii himo seppa ka hoore ndiyan, be huli, be wi'i: «Ko mbeelu!» E nder kulol mabbe ngol be sonki.

²⁷ Iisaa wi'i be kisan: «Hoolee, ko min nii! Wota on hulu!»

²⁸ Onsay Petruusu jaabii mo, wi'i: «Si tawii ko onon, yo Koohoojo, yamiree lan yo mi rewu ka hoore ndiyan, mi yaha ka wondon ton.»

²⁹ Iisaa wi'i mo: «Aru!»

Onsay Petruusu tippii ka laana, o seppi ka hoore ndiyan, o yahi fottoygol e Iisaa.

³⁰ Kono bay o yi'ii ko hendu ndun tiidi kon, o huli. Tun o fuddii mutude, o sonki, o wi'i: «Dandee lan, yo Koohoojo!»

³¹ Iisaa fonti jungo mun ngon, nangi mo, o wi'i: «Ko an yo fanda-gomdinaljo, ko hondun sikkantodaa?»

³² Onsay be yawi ka laana, hendu ndun deyfiti. ³³ Wonnoobe ka laana ben sujjani mo, wi'i: «Ka haqiqiqa, ko a *Biddo Alla!»

³⁴ Bay be gaynii lumbude weendu ndun, be hewti Jaani-Saarata. ³⁵ Yimbe nden nokkuure anditi Iisaa, be nuli e banjeeji don din fow. Be addani mo jawbe ben fow, ³⁶ be jeeji mo yo o newnan be tun be meema kombol dolokke makko on, onsay meemunoobe mo ben fow ndikki.

Fii Fariisiyaabe ben e Aadaaji mun din

(Mrk. 7.1-23)

15 ¹ Onsay *Fariisiyaabe e jannoobe fii Sariya on iwri Yerusalaam, ari tawi Iisaa, be landii mo, be wi'i: ² «Ko fii hondun taalibaabe maa ben jaggitanta naamuji mawbe ben? Ko fii be soodotaako nde hibe naama.»

³ O jaabii ɓe, o wi'i: «Onon non ko hondun jaggitanton yamirooje Alla den sabu naamuuji mon din? ⁴ Ko fii Allaahu on no daali: ‹Teddin yumma maa e ben maa›,^d awa kadi: ‹on mo hudi ben mun maa yumma mun donkinirte mayde.›^{d5} Kono onon, hidon wi'a wonde kala wi'udo ben mun maa yumma mun: ‹mi yedii Alla ko mi nafiraynoo on kon›, ⁶ haray fawaaki ontigi wallugol ben mun maa yumma mun. Si ko nii, haray on mehindinii daaluyee Alla on sabu naamu mon on. ⁷ Ko onon yo faasiqiibe, Isaaya no haalunoo ko Alla longini mo fii mon moyyā, o wi'i:

⁸ ‹Oo jamaa ko ka toni mun woni lan mawninde,
kono berde mabbe den no woddondiri e an fota.

⁹ Ko e nder meerebe woni lan rewude,
janndeeji dī ɓe woni jannude din ko dī yimbe ɓen sinci.›»^e

¹⁰ Onsay Iisaa noddi jamaa on e makko, o wi'i ɓe: «Hedee, faamon. ¹¹ Hinaa ko naatiri ka hunduko tuuninta neddo, kono ko ko yaltirta ka hunduko kon tuuninta neddo.»

¹² Onsay taalibaabe makko ɓen badii mo, wi'i: «Hidon andi Fariisiyaabe ɓen mettinii sabu nanugol ngol kongol?»

¹³ O jaabii ɓe, o wi'i: «Kala ko tutaa, ko tawi hinaa Ben an Kammuyankeejo on tuti, borete. ¹⁴ Tertee ɓe, ko bumbe woni dowude bumbe. Si bundo non dowii bundo, ɓe didoo non ɓe yanay e nder ngayka.»

¹⁵ Petruusu yetti haala kan, wi'i: «Sifanee men fii ngal misal.»

¹⁶ Iisaa wi'i mo: «E onon kadi haa jooni ko on ɓe alaa faamu? ¹⁷ E on andaa kala ko naati ka hunduko ko ka nder reedu yahata, ɓawto dun hawkoyee ka weddii?

¹⁸ Kono ko yaltiri ka hunduko kon ko ka bernde iwri, e ko dun-le tuuninta neddo.

¹⁹ Ko fii, ko e nder bernde neddo mijooji bondi yaltata, kajun e waru-hoore e

^d15.4 Egg. 20.12 e Yaj. 5.16

^{d5}15.4 Egg. 21.17 e Lew. 20.9

^e15.9 Isa. 29.13

jinaa e cagayaagal e nguyka e seeditagol fenaande e hoyre.²⁰ Ko dun woni ko tuuninta neddo. Kono jaamugol hara soodaaki, dun tuunintaa neddo.»

Fii no Debbo Kanaaniyankeejo on Gomdiniri

(*Mrk. 7.24-30*)

²¹ Bay Iisaa iwii e nden nokkuure, o yahi e ndii leydi dee ca'e Tiiri e Siduuna.

²² Tun, debbo Kanaaniyankeejo hodudo don ari tawi mo, no ewnoo, wi'a:
«Koohoojo, bii Daawuuda, yurminee lan! Jinna no tampini jiwo an on no hawnori!»

²³ Laatii kanko Iisaa o jaabaaki mo hay kongol. Taalibaabe makko ben badii mo, wi'i: «Yiltee oo debbo, ko fii himo sonkude 6aawo men.»

²⁴ O jaabii, o wi'i: «Ko fii ko baali suudu Isra'iila majjudi din tun mi addiraa.»

²⁵ Kono kanko debbo on o ari, o jicci yeeso makko e hoore himo wi'a:
«Koohoojo, faabee lan!»

²⁶ O jaabii debbo on, o wi'i: «Moyyaa ka bireedi paykoy koy yettee, buganee bareeji din.»

²⁷ Debbo on jaabii: «Hiiyii, Koohoojo, kono hay bareeji din jaamay ko iwata ka taabal jom majji, saama kon.»

²⁸ Onsay Iisaa jaabii mo, wi'i: «Debbo, gomdininal maa ngal no tiidi. Yo wonirane no faaliradaa non.» E on saa'i tigi jiwo makko on ndikki.

Fii no Iisaa Namminiri Yimbe Guluje Nay

(*Mrk. 8.1-10*)

²⁹ Bay feyyii e dun, Iisaa iwi e nden nokkuure, o takkii sera *Weendu Jaliilu ndun. O yawoyi don e fello, o joodii. ³⁰ Jamaa moolanaado kadi badii mo, wondude e boofoobe e bumbe e layoobe e pahidube-mbobidi e nawbe goo buy. Be wallini ben e ley koyde makko, o sellini be. ³¹ Bay jamaa on yi'ii pahidube-mbobidi ben

wowlii, layooōe ɓen kadi hettii cellal, boofooōe ɓen yahii, bumbe ɓen yi'ii, ɓe ɳaldii, ɓe mawnini Alla Isra'iilayanteebe ɓen.

³² Onsay Iisaa noddi taalibaabe mun ɓen, o wi'i: «Oo jamaa no yurmammi, wonii nii balde tati hibe wondi e an, ɓe alaa ko ɓe jaama. Mi faalaaka ɓe yiltude hibe weelaa, sakko ɓe lo'a ka laawol.»

³³ Kono taalibaabe ɓen wi'i mo: «Ko honto men hebata bireedi ko yonata oo jamaa doo fow e ndee nokkuure wuldinnde?»

³⁴ Iisaa landii ɓe, wi'i: «Ko bireedijje jelu mardon?»

Be jaabii mo, ɓe wi'i: «Ko bireedijje jeedidi e likkoy tosokoy seeda.»

³⁵ Onsay o torii jamaa on joodagol ka leydi. ³⁶ Bay o yéttii bireedijje den jeedidi e liyýi din, o jarnii Alla, o tayiti, o woni e jonnugol taalibaabe makko ɓen, taalibaabe ɓen kadi hewtini jamaa on. ³⁷ Fow jaami haa haari, moobitaa debeeje jeedidi tew ko lutti. ³⁸ Tawi ɓen jaamube ko ɓe worbe guluuje nayo, hara rewbe e faybe lintaaka. ³⁹ Bawto dun o yilti jamaa on, o bakii e laana, o yahi e ndii leydi Magaduuna.

Fii no Iisaa Tororaa Hollugol Maande

(Mrk. 8.11-13; Luk. 12.54-56)

16¹ Onsay *Fariisiyaabe ɓen e *Saddusiyaabe ɓen ɓadii mo kanko Iisaa fii ndarndagol mo, ɓe torii mo yo o hollu ɓe maande iwrunde ka kammu. ² Iisaa jaabii ɓe, wi'i: «Kiikiide on wi'ay: <Yaasi on hentoto, fii ko kammu ngun wojji kon.>³ Bimbi kadi wi'on: <Hande wundinay, ko fii kammu ngun no wojji ɓawli.> Hidon waawi faamude fii ko feejni ka kammu kon, kono on waawataa faamude fii maandeeji saa'iiji din? ⁴ Jamaanu bonngu jinoowu no dabbäa maande, kono ngu jonnaake maande goo, si hinaa sifa ndee nde Yuunusa.» Onsay o acci ɓe don, o yahi.

Fii «Lewen» Fariisiyaabe ben e Sadduusiyaabe ben

(*Mrk. 8.14-21*)

⁵ Ko ɓe lumbitata, taalibaabe ben yejjiti yettorde bireedi. ⁶ Iisaa wi'i ɓe: «Reenee fota e lewen Fariisiyaabe ben e Sadduusiyaabe ben!»

⁷ Taalibaabe ben wi'indiri: «Ko o wi'iri dñun, ko fii en yettaali bireedi.»

⁸ Bay Iisaa andii dñun, o wi'ibe: «Ko fii hondun wi'andon dun, onon bee fanda-gomdinalɓe? Ko fii on yettaali bireedi? ⁹ Jaka on faamaali haa jooni, on anditaali fii bireedijje jowi senditananoode worbe guluuje njowo den, e ko debeeje jelu artirnodon ko lutti? ¹⁰ E bireedijje den jeedidi senditananoode worbe guluuje nayo den, e yeru debeeje ko artirnodon ko lutti? ¹¹ Ko honno woniri on faamaali wonde hinaa fii bireedi mi wowlani on? Kono reenee e lewen Fariisiyaabe ben e Sadduusiyaabe ben!»¹² Onsay ɓe faami ko o inni yo ɓe reeno, ko e jannde Fariisiyaabe ben e Sadduusiyaabe ben, hinaa e lewen wadeteedo e bireedi.

Fii Qirritannde Petruusu nden

(*Mrk. 8.27-30; Luk. 9.18-21*)

¹³ Nde Iisaa naatunoo Seezariiya-Filiipu, o landii taalibaabe makko ben ngal landal doo, o wi'i: «E wi'i yimbe ben, ko hombo woni *Bii-Aaden on?»

¹⁴ Be jaabii mo, ɓe wi'i: «Wobbe no wi'a ko onon woni Yaayaa lootaynoodo on, wobbe kadi no wi'a ko onon woni Liliya, wobbe goo kadi no wi'a ko onon woni Yeremiiya maa goddo goo e annabaabe ben.»

¹⁵ O wi'i ɓe: «Onon non wi'udon ko hombo woni lan min?»

¹⁶ Sim'uunu Petruusu jaabii mo wi'i: «Ko onon woni *Almasiihu on, on *Biddo Alla Wuurudo on!»¹⁷ Iisaa yettiti haala kan, wi'i mo: «A malii, yo Sim'uunu mo Yuunusa, ko fii hinaa bandu e yiyan fejninan-maa dun, kono ko Ben an, on

Wondo ka kammu.¹⁸ Min non mi wi'ii an Petruusu, ko a fetere.^f Ko e hoore ndee fetere mi darnata *moftal an ngal, hay doole jahannama foolataa ngal.¹⁹ Awa kadi mi jonnoyte saabijje laamateeri kammu ngun: ko tojudaa ka leydi woo haray tojaama ka kammu, ko jabudaa ka leydi woo haray jabaama ka kammu.»²⁰ Onsay o yamiri taalibaabe ben, o tentini, wota be wowlan hay gooto wonde ko kanko woni Almasiihu on.

Fii Tampereeji Iisaa din e Artugol makko ngol

(Mrk. 8.31-9.1; Luk. 9.22-27)

²¹ Gila nden nande, Iisaa fuddii hollude taalibaabe mun ben wonde ko bee o yaha Yerusalaam, o tampinoyee fota immorde e mawbe ben e hooreebe *yottinoobe sadaka ben e jannoobe fii Sariya on ben, o waree, o immintinoyee ka nalaande tammere.

²² Onsay Petruusu pottini mo sera, o woni mo e felugol wi'a: «Yo Allaahu on reenu on, yo Koohoojo, hara dun hewtaali on!»

²³ Kono Iisaa yeýýitii, wi'i Petruusu: «Yilto ɓaawo an, yo Ibiliisa, bay an ko a fegginoowo lan! Ko fii mijooji maa din hinaa di Alla, kono ko di yimbe ben!»

²⁴ Onsay Iisaa wi'i taalibaabe mun ben: «Kala faalaado jokkude lan, yo o hayfintino, o yetta *leggal makko altindiraangal ngal,^g o jokkammi.²⁵ Kala faalaado dandude ngurndan mun, dan hayriray mo, kono kala non mo ngurndan mun hayrira sabu an min, o hettay dan.²⁶ E ko nafa hondun woodani neddo hebugol aduna on fow, hayra wonkii mun kin? Maa ko hondun neddo ittata fii sottugol wonkii mun kin?²⁷ Ko fii Bii-Aaden on ardoay e mangural Ben mun ngal, wondude e malaa'ikaabe mun ben, o jonnita mo kala njoddi kuude mun.

^f16.18 Ndee innde «Petruusu» no firi «fetere».

^g16.24 «Yettugol leggal mun altindiraangal ngal» ko hebilagol jokkugol Iisaa haa maaya.

²⁸Ka haqiiqa mi andinii on, no woodi wobbe e mon onon wonbe doo ben, be maayataa ado be yi'ude Bii-Aaden on no arda e laamu mun ngun.»

Fii Waylannde Mbadi Iisaa ndin

(*Mrk. 9.2-10; Luk. 9.28-36*)

17¹Balde jeegoo bawto dun, Iisaa yetti Petruusu e Yaaquuba e Yuuhanna neene-gooto Yaaquuba on, o nabi be kambe tun e hoore fello toowungo. ²Mbadi makko ndin waylii yeeso mabbe, yeeso makko ngon jalgiri wa naange, conci makko din kadi rawniri wa ndaygu. ³Muusaa e Iiliya feejani be, tawi hibe yewtida e makko kanko Iisaa.

⁴Onsay Petruusu yetti haala kan, o wi'i Iisaa: «Koohoojo, no moyyi ka wonen doo. Si hidon faalaa toode mi darnay doo togooji tati, onon wonndu, Muusaa wonndu, Iiliya kadi wonndu.»

⁵Wa fewndo ko o wowlata dun, duulere jalgunde tippii buumi be. Onsay hawa yalti ka duulere, wi'i: «Oo doo ko Biddo an yidaado, mo mi weltoi on. Heditee mo!»

⁶Bay wonii kambe taalibaabe ben be nanii dun, be hebi kulol tiidungol, be suuyi, be sujji. ⁷Kono Iisaa badii, meemi be, o wi'i: «Immee! Wota on hulu!»⁸Onsay be banti gite den, be tawi be yi'itali hay gooto, si hinaa Iisaa tun.

⁹E nder ko be tippotoo kon ka fello, Iisaa yamiri be, wi'i: «Wota on wowlan hay gooto fii ko yi'udon kon, haa nde *Bii-Aaden on immintinaa e hakkunde maybe ben woo.»

¹⁰Onsay taalibaabe ben landii mo, be wi'i: «Ko fii hondun jannoobe fii Sariya on ben wi'anta wonde ko Iiliya haani arude taho?»

¹¹O jaabii be, o wi'i: «Ko goonga Iiliya aray, wattitoo fow. ¹²Kono mi andinii on Iiliya ariino, kono be anditaali mo, be wadiri mo no be faaliraa non. Ko wano non

kadi 6e tampinirta Bii-Aaden on,»¹³ Onsay taalibaabe ben faami wonde ko fii Yaaya lootaynoodo maande tuubuubuyee on o yewti 6e.

Fii no Paykun Jinnaakun Selliniraa

(*Mrk. 9.14-29; Luk. 9.37-43*)

¹⁴ Bay wonii 6e hewtii takko jamaa on, onsay gorko goo ari jicci yeeso Iisaa, o wi'i: ¹⁵ «Koohoojo, yurminee biddo an on. Ko o iirotoodo, himo tampi fota. Soono woo o yanay ka yiite e ka ndiyan. ¹⁶ Mi addii mo ka taalibaabe mon ben, kono 6e waawaali mo jawndude.»

¹⁷ Iisaa jaabii, wi'i: «Onon ko on jamaanu boyliingu ngu gomdinaa. Ko haa honde tuma mi wondata e mon? E ko haa honde tuma mi mujnantoo on? Addanee lan mo doo.» ¹⁸ Iisaa tonjani jinnawii ngin, ngii yalti e paykun kun, kun ndikki e on saa'i tigi.

¹⁹ Onsay taalibaabe ben gundii Iisaa, wi'i mo: «Ko fii hondun menen men waawaali radaade ngii jinnawii?»

²⁰ Iisaa jaabii 6e, wi'i: «Ko sabu ko gomfinal mon ngal fandi kon. Ko fii ka haqiiqa mi andinii on, hay si tawii gomfinal mon ngal no fota e abbere bene, si on wi'iino ngoo fello: <Iwu doo!>, ngo iwayno. Harayno hay huunde alaa ko ronkaynodon. ²¹ Kono sifa ngii jinnawii, ko toraare Alla e hoorugol tun yaltinta ngii.»

Fii Mayde Iisaa nden e Ummatal Makko ngal

(*Mrk. 9.30-32; Luk. 9.43-45*)

²² Nande goo tawi Iisaa e taalibaabe mun ben no mottondiri Jaliilu, o wi'i 6e: «Bii-Aaden on wattete e juude yimbe ben, ²³ 6e wara mo, ka jalaande tammere o immintinoyee.» Dun aanini 6e fota.

Fii Yobugol Sagalle Juulirde Mawnde nden

²⁴ Fewndo ko be naatata Kafernahuum, yantooße sagalle fii *juulirde mawnde nden ari, be tawi Petruusu, be landii mo, be wi'i: «E hara karamoko mon yobataa sagalle fii juulirde mawnde nden?»

²⁵ Kono o jaabii be, o wi'i: «Oo'o, be yobay!»

Bay wonii Petruusu naatii ka suudu, Iisaa attii mo landaade, o wi'i: «Sim'uunu, ko hondun sikkudaa? Ko hombo lambe leydi yantata sagalle? Ko bibbe mabbe ben kaa ko heddiibe ben?»

²⁶ O jaabii mo, o wi'i: «Ko heddiibe ben.»

Iisaa wi'i mo: «Awa yobugol dün fawaaki bibbe ben kan. ²⁷ Kono fii wota en mettin berde ben yantooße sagalle, yahu ka weendu, bugodaa ndolinwal maa ngal ka ndiyan, nangaa lingii adiingii modude ngin, udditaa hunduko maggii on, a taway ton tammaru kaalisi ndu mbuudi nay. Yettaa ndu, jonnaa ben yantooße fii sagalle men den enen dido.»

Fii Burdo Teddude on ka Laamu Kammu

(Mrk. 9.33-37; Luk. 9.46-48)

18¹ E on saa'i don taalibaabe ben badii mo kanko Iisaa, be wi'i mo: «Ko hombo buri teddude ka laamu kammu ngun?»

² Onsay Iisaa noddii paykun, o joddini kun hakkunde mabbe, ³ o wi'i: «Ka haqiiqa mi andinii on, si on waylaali jikku mon on, wa'on wa paykoy, on naatataa few ka laamu kammu. ⁴ Ko dün wadi, kala jippindo hoore mun, wa'i wa kun paykun doo, o wonay burdo teddude on ka laamu kammu. ⁵ Awa kadi kala jabudo paykun wa kun doo, e innde an, haray ko min tigi o jabi. ⁶ Kono on mo woni sabu feggingol gokkun e koy paykoy gomdsinkoy lan, haray ko buri mo moyyande ko kolmbireede tuntere hayre, o bugee ka ndanka baharu.

⁷ «Bone wonanii oo aduna sabu dii piiji fegginaydī. Ko fii bee pegge wada, kono bone wonanii on neddo wondo sabu haa dun wadi! ⁸ Si tawii jungo maa ngon maa koyngal maa ngal wonay sabu ko feggin-maa, haray tayū de, bugodaa ka wodditi-maa. Ko fii no ɓuru-maa moyyande ka naataa ka ngurndan, hara ko a taya-jungoojo maa taya-koyngaljo, edii a jogaade koyde didi maa juude didi buggedaa ka yiite poomayankeeewe. ⁹ Si tawii-le ko yiitere maa nden wonata sabu ko feggin-maa, haray awu nde, bugodaa ka wodditi-maa. Ko fii no ɓuru-maa moyyande ka naataa ka ngurndan hara ko mo a yiitere wootere, edii a jogaade gite didi, buggedaa ka yiite jahannama.»

Misal Yettaangal e Baalii Majjungii

(Luk. 15.1-7)

¹⁰ «Wota on hayfin hay gootun e koy paykoy. Ko fii mi andinii on, malaa'ikaabe makkoy on ka kammu no darii tabiti yeeso Ben an Wondo ka kammu on. ¹¹ Ko fii ko addi *Bii-Aaden on, ko fii dandugol majjube ɓen.

¹² «Ko hondun sikkudon? Si goddo no mari baali teemedere, si gootii e din majji, e hara o accataa diya cappande jeenay e jeenay ka hoore fello, o dabbitoya ngiya majjungii? ¹³ Si o aru ngii e yiitude, ka haqiiqa mi andinii on, o weltoray ngii ɓuri diya cappande jeenay e jeenay di majjaali. ¹⁴ Ko wano non, hinaa e sago Ben mon Wondo ka kammu on si gooto e bee faybe no majja.»

Fii Yaafondirgol e Yaafaneede

¹⁵ «Si musiddo maa fawrike e maa, yahu yiidaa e makko, hara ko an tun kanko tun. Si o jabanii ma, haray a hettii musiddo maa on. ¹⁶ Kono si o jabanaali ma, haray dabbu gooto maa dido, wattidaa e maa, fii kala ko yewtaa yo naawiroye kongudi seedeefbe dido maa tato. ¹⁷ Si o jabanaali bendon kadi, haray yeeto

*moftal ngal. Si o jabanaali non moftal ngal kadi, haray yo o jogore wa mo gomdinaa maa wa yantiroowo sagalle janfa.

¹⁸ «Ko fii ka haqiiqa mi andinii on, ko torjudon ka leydi woo haray tonjaama ka kammu, e ko jabudon ka leydi woo haray jabaama ka kammu. ¹⁹ Ka haqiiqa mi andinii on kadi, si dido e hakkunde mon nanondirii ka hoore leydi fii toragol kala ko woni, Ben an Wondo ka kammu on okkay ɓe dun. ²⁰ Ko fii ka dido maa tato mottondiri e innde an woo, haray mido hakkunde mabbe.»

²¹ Onsay Petruusu badii, wi'i mo: «Koohoojo, ko haa laabi jelu mi haani yaafaade musiddo an, si himo fawjaade e an? Ko haa laabi jeedidi?»

²² Iisaa jaabii mo: «Mi wi'aali ma dey ko haa laabi jeedidi, kono ko haa cappande jeedidi laabi jeedidi. ²³ Ko dun wadi, laamu kammu ngun no wa'i wa lando faalanoodo yo jiyaabe mun hunito dun. ²⁴ No on lando fuddornoo, ɓe addani mo goddo joganiido mo ujune kaalisi. ²⁵ Nde tawnoo alaa ko o yobira, jom makko yamiri yo o yeeyite, kanko e beyngu makko e bibbe makko ɓen e kala ko o joginoo, namaande nden yobee.

²⁶ «Onsay jiyaado on suuyi ka leydi, jicci yeeso makko, wi'i: «Koohoojo, mujjanee lan, mi yobay on fow!» ²⁷ Jom makko yurmaa mo, o yaafanii mo namaande nden, o acciti mo, o yahi.

²⁸ «Ko on jiyaado yaltata don, o yiidi e dimmoojo makko goo, joganiido mo *dinaruuji teemedere. O nangi mo, o deddi, e hoore himo wi'a: «Yoban ko joganidaa mi kon!» ²⁹ On dimmoojo makko yani e ley koyde makko, jeeji mo, wi'i: «Mujjanee lan, mi yobete!» ³⁰ Kono o jabaali. O nabii mo, o sokoyi haa o yoba mo ko o joganii mo kon. ³¹ Bay dimmoobe makko ɓen yi'ii kon ko wadi, ɓe aani fota, ɓe yahi, ɓe fillitanii jom mabbe ko wadi kon fow.

³² «Onsay jom mabbe noddi on jiyaado, o wi'i mo: «Ko an, yo jiyaado bondo, mi yaafanike ma namaande maa nden fow, bay a jeejii lan. ³³ An kadi a waawataano yurmeede dimmoojo maa on, wano mi yurmira-maa non?» ³⁴ Jom makko tikki, o

wattidi mo e lettoobe ben haa nde o yobi ko o nawlii kon fow woo.³⁵ Ko nii Ben an Kammuyankeejo on wadirta on, si mo kala e mon yaafanaaki musiddo mun on ka bernde mun.»

Fii Sertigal Yettindirbe

(*Mrk. 10.1-12*)

19¹ Bay wonii Iisaa gaynii din yewtereeji, o iwi Jaliilu don, o ari ka seraaji diiwal Yahuuda gada Yurdayniwol. ²Jamaa moolanaado jokki mo. O sellini be don.

³ Onsay *Fariisiyaabe goo badii mo fii ndarndagol mo, be wi'i: «E hara no daganii goddo accitugol beyngu mun fii ko woni woo?»

⁴ O jaabii be, o wi'i: «On jangaali wonde ka fuddoode, Tagudo on tagii be, o wadi be gorko e debbo, ⁵ o daali: ‹Ko dun wadi si gorko selay ben mun e yumma mun, humoo e beyngu mun, onsay kambe dido be wona gooto.›^{h6} Dun haray hinaa be dido hande kadi, kono ko gooto. Awa wota goddo sendindir ko Alla hawtindiri kon.»

⁷ Kono Fariisiyaabe ben landii mo, wi'i: «Ko hondun non Muusaa yamirani accitoowo beyngu mun woo yo wadan mo kaydi sertigal, si o accita mo?»

⁸ Kanko Iisaa o jaabii be, o wi'i: «Ko sabu cattal mon bernde ngal wadi si Muusaa newnani on accitugol rewbe mon ben, kono ka fuddoode hari hinaa non. ⁹ Kono mi andinii on, kala accitudo beyngu mun yetti goddo goo, si wonaa hara on jeenu, haray ontigi jeenii.»

¹⁰ Onsay taalibaabe makko ben wi'i mo: «Si tawii ko nii woniri hakkunde gorko e debbo, haray nafa alaa himo tigga.»

¹¹ O jaabii be, o wi'i: «Wonaa fow jabata ngol kongol, kono ko yedaabe dun ben tun. ¹² Ko fii no woodi mayraabe hara ko hebidaabe e mun, no woodi wobbe kadi

^h19.5 Fud. 2.24

hara ko ɓe bujaabe, no woodi woobbe kadi hara ko ruudiibe fii laamu kammu ngun. On waawudo jabude yo jabu!»

Fii no Iisaa Du'orani Paykoy koy

(*Mrk. 10.13-16; Luk. 18.15-17*)

¹³ Onsay yimbe ben addani mo paykoy, fii yo o *fawu juude makko den e makkoy, o du'anoo koy, kono taalibaabe ben torjani ben. ¹⁴ Iisaa wi'i: «Tertee paykoy koy, wota on hadu koy arugol e an, ko fii laamu kammu ngun ko sifa makkoy wonani.» ¹⁵ Onsay o fawi juude makko den e makkoy, o du'anii koy, o iwi don.

Fii Suka Galo on

(*Mrk. 10.17-31; Luk. 18.18-30*)

¹⁶ Goddo goo kadi ɓadii Iisaa, wi'i mo: «Karamoko, hara ko hondun e ko moyyi mi haani wadude fii yo mi heboy *ngurndan poomayankejan dan?»

¹⁷ Onsay Iisaa jaabii mo, wi'i: «Ko fii hondun landortaa mi fii ko moyyi kon? Ko gooto pet moyyi. Si hida faalaa naatude aljanna, dofto yamirooje den.»

¹⁸ O jaabii: «Honde?»

Iisaa jaabii mo: «Wota a ittu hoore, wota a jeenu, wota a seedito fenaande, wota a wujju, ¹⁹ teddinaa kadi yumma maa e ben maaⁱ, yidiraa nokondo maa on wano yidirdaa hoore maa non.»^j

²⁰ On suka wi'i mo: «Mido wadude dun fow. E hara ko hondun njakkanimmi kadi?»

²¹ Iisaa wi'i mo: «Si hida faalaa wonude timmudo, yahu yeeyitaa ko mardaa kon, okkaa miskinbe ben, dun wonanoyte keyee ka kammuuli, onsay araa jokcaa mi.»

²² Bay on suka nanii din kongudi, o yahi himo aani, ko fii hari himo aldi fota.

ⁱ19.19a Egg. 20.12-16

^j19.19b Lew. 19.18

Fii Accube ko Jeyi kon fow, Jokki Iisaa

²³ Onsay Iisaa wi'i taalibaabe mun ɓen: «Ka haqiiqa mi andinii on, no sattani jom jawle ka o naata ka laamu kammu. ²⁴ Mi andinii on kadi, no ɓuri weebande ngelooba ka mba rewa e wuddere meselal edii ka jom jawle naata ka *laamu Alla.»

²⁵ Bay taalibaabe ɓen nanii dун, ɓe ɣaldì fota, ɓe wi'i: «E hara ko hombo dandoytee?»

²⁶ Iisaa ndaari ɓe, wi'i: «Dun waawantaako neddanke, kono fow no waawanoo Alla.»

²⁷ Onsay Petruusu yetti haala kan, wi'i mo: «Awa e hino, men accii ko men jeyi kon fow, men jokkii on. Ko honno non woniranoyta men?»

²⁸ Iisaa jaabii ɓe, wi'i: «Ka haqiiqa mi andinii on, nde *Bii-Aaden on joodii ka jullere mun laamu darjinnde, tuma nde kala huunde no heydintinee, onon jokkunoobe lan ɓen kadi, on joodoyto e julle laamu sappoo e didi, laamoyodon *bolondaaji Isra'iila din sappoo e didi. ²⁹ Awa kadi kala accudo suudu mun ndun e musibbe mun ɓen e bandiraabe mun ɓen e yumma mun e ben mun e bibbe mun ɓen e gese mun den sabu innde an nden, o heboyay ko ɓuri dун laabi teemedere ka aduna doo, o ronoyay kadi ngurndan poomayankejan dan. ³⁰ Kono wonɓe yeeso buy wontiroyay baawo, baawoobe ɓen wontiroya yeeso.»

Misal Yettaangal e Jom Ngesa e Golloobe mun

20¹ «Ko fii laamu kammu ngun no wa'i wa jom galle, yaltudo bimbi law fii yettugol golloobe ko golla ka ngesa mun *wiijnu. ² Be fotti e njoddi, nallal kala *dinaruuru. Onsay o immini ɓe ka ngesa makko wiijnu. ³ O yaltoyi ka walluhaa, o yi'i wobbe ka fottirde, tawi ɓen alaa wadude hay huunde. ⁴ O wi'i ɓen: «Onon kadi yahee ka ngesa an wiijnu, mi yobiray on no haaniri.» Ben yahi. ⁵ O yaltoyi kadi ka ado fanaa e ka baawo fanaa, o wadiri wano non. ⁶ O yaltoyi kadi ka alansaraa, o tawi wobbe

ka fottirde kadi, o wi'i ben: «Ko fii hondun nallandon doo, hay huunde on alaa wadude?»⁷ Ben jaabii mo, be wi'i: «Ko fii men hebaali golle.» O wi'i ben kadi: «Awa, yahee ka ngesa an wiiju.»

⁸ «Bay nibbii, jom ngesa wiiju mban wi'i mbatulaajo mun on: «Noddu gollooбе ben, yobaa be njoddi mabbe ndin. Fuddoraa yettaabe sakkitorun ben, sakkitoraa adaabe yetteede ben.»⁹ Yettaabe ka alansaraa ben ari, mo kala e mabbe hendii dinaruuru.¹⁰ Attaabe yetteede ben kadi ari, e hoore no sikka hebay ko buri dun. Kono kambe kadi mo bee e mabbe hendii dinaruuru.¹¹ Bay be hendike, be ηurjurti jom galle on,¹² be wi'i: «Bee sakkitiibe arude ko saa'i gooto pet golli! A fonnii be e amen, menen bee tudiibe yangi e nguleendi nallal ngal peetu?»¹³ O jaabii goddo e mabbe, o wi'i: «Njaatigi an, mi janfaaki ma, hinaa en fottuno dinaruuru?»¹⁴ Yettu ko maa kon, yahaa. Ko e yidi an wadi si mido jonnude sakkitiido arude on wa ko maa kon.¹⁵ E hara mi newnanaaka wadirgol ko mi jeyi kon no mi faaliraa woo? Kaa ko fii mido moyyi ndaarirtaa mi gite bonde?»
¹⁶ «Ko wano nii kadi baawooбе ben wontirotya yeeso, yeesoobe ben kadi wontiroya baawo.»

Fii ko Saatii Heboyde Iisaa kon

(Mrk. 10.32-34; Luk. 18.31-34)

¹⁷ Fewndo ko be yahata Yerusalaam, Iisaa pottini taalibaabe mun ben sappoo e dido sera, o wi'i be:¹⁸ «Awa hidem yahude Yerusalaam. Bii-Aaden on wattete e juude hooreebe *yottinoobe sadaka ben e jannoobe fii Sariya on ben, be hapania mo wareede.¹⁹ Be wattu mo e juude be wonaa Yahuudiyanke ben, ben jala mo, be focca mo, be fempa. Bawto dun o immintinoyee ka nalaande tammere.»

Fii ko Yumma Yaaquuba e Yuuhanna Torii Iisaa kon

(*Mrk. 10.35-45*)

²⁰ Onsay yumma faybe Zabadii ben e bibbe mun ben badii Iisaa, be jicci fii toragol mo. ²¹ Kanko Iisaa o wi'i mo: «Ko hondun faaladaa?»

Kanko debbo on o jaabii mo, o wi'i: «Yamiree yo bee bibbe an doo dido joodoyo ka laamateeri mon, goddo on wonira ka naamo mon, oya on ka nano mon.»

²² Iisaa jaabii be, wi'i: «On andaa ko wondon lan toraade. E hara on waaway yarirde jardukun tampere kun mi yarirta kun?»

Be jaabii: «Men waaway.»

²³ O wi'i be: «Ko goonga on yariray jardukun an kun. Kono fii joodoyagol ka naamo an maa ka nano an, hinaa min yedata fun, kono ko Ben an yedata dun be o ebbani fii dun ben.»

²⁴ Bay beya taalibaabe sappo nanii dun, be seytinani ben neene-gootooibe dido.

²⁵ Onsay Iisaa noddi be, o wi'i: «Hidon andi hooreebe diya leyfyi no laamori di doole, awa kadi lambe mabbe ben no feyfintini laamu ngun e hoore mabbe.

²⁶ Kono onon, wota on wa'u wa ben. Kala faalaado wonde teddudo e hakkunde mon, yo wonu kurkaadu mon. ²⁷ Awa kadi kala faalaado wonde yeesoojo e hakkunde mon, yo wonu maccudo mon. ²⁸ Ko wano non, *Bii-Aaden on ardaali fii kurkanegol, kono ko fii kurkanagol, okkitira ngurndan mun dan fii cottudi duudube.»

Fii no Iisaa Wuntiniri Bumbe dido Yeerikoo

(*Mrk. 10.46-52; Luk. 18.35-43*)

²⁹ Bay wonii be yaltii Yeerikoo, jamaa duududo jokki mo kanko Iisaa. ³⁰ Tawi bumbe dido no joodii ka sera laawol. Be nani wonde Iisaa no feyyude, be ewnii, be wi'i: «Yurmee men, yo Koohojo, bii Daawuuda!»

³¹Jamaa on feli ɓe fii yo ɓe fanku. Kono ɓe burti ewnaade, wi'a: «Yurminee men, yo Koohoojo, ɓii Daawuuda!»

³²Onsay Iisaa dartii, o noddi ɓe, o wi'i: «Ko hondun faaladon yo mi wadan on?»

³³Be wi'i mo: «Ko yo men wuntu, yo Koohoojo!»

³⁴Iisaa yurmaa ɓe, o meemi gite mabbe den. Be wunti kisan, ɓe jokki mo.

Fii Naatugol Iisaa Yerusalaam

(*Mrk. 11.1-11; Luk. 19.28-44; Yhn. 12.12-19*)

21¹Bay wonii ɓe badike Yerusalaam haa ɓe hewtii Bayti-Faazii, dун ko takko Fello

*Zaytuuni ngon, kanko Iisaa o nuli taalibaabe makko dido, ² o wi'i ɓe: «Yahee e ngoo hodo wongo yeeso mon doo, on taway don kisan mbabba no humii, hara himba wondi e mbabun mabba. Hunton di, addanon mi. ³Si goddo aru on e landaade godsun, on wi'ay mo: <Ko haaju Koohoojo on yani e majji.> Onsay o accay di ara.»

⁴Dun wadiri fii ko daaliranoo annabaajo on kon no laatora:

⁵«Wi'u jamaa *Siyuuna on:

<E hino lando maa on ka arata e maa,

himmo waddii mbabba,

himmo yawi e hoore mbabun keccun,

e hoore bikkun mbabba,

himmo heewi newaare.»»^k

⁶Taalibaabe ben yahi, wadi ko Iisaa yamiri ɓe kon. ⁷Be addoyi mbabba mban e mbabun mabba on. Be ndaddani mo conci mabbe din e hoore majji, o joodii don.

⁸Tawi yimbe duudube e nder jamaa on no ndaddanaynoo mo conci mun din ka laawol, wobbe ben taya caldi ledde den, ndaddana mo ka laawol. ⁹Tawi jamaa hikkornoodo yeeso e iwtilnoodo baawo Iisaa on no ewnaade, wi'a:

^k21.5 Zak. 9.9

«Hosannaa*, yo bii Daawuuda!

Yo barki wonan oo wondo arude e innde Joomiraado on,
darja burdo toowude wonanii ma.»^m

¹⁰ Bay wonii o naatii Yerusalaam, saare nden fow memminii, wi'i: «Ko hombo
woni oo?»

¹¹ Jamaa on jaabii, wi'i: «Ko annabi Iisaa oo jeyaado Naasirata, d'un ko e nder
Jaliilu.»

Fii no Iisaa Radori Yeeyoobe ben ka Juulirde Mawnde

(*Mrk. 11.15-19; Luk. 19.45-48; Yhn. 2.13-16*)

¹² Bay wonii Iisaa naatii ka dingiral *juulirde mawnde, o radii yeeyaynoobe ton
ben fow e soodaynoobe ben. O wayliti taabe wadaynoobe sensa-sensita ben, e
julle yeeyaynoobe gabooji ben, ¹³ hara himo wi'ora be: «No windii: «Suudu an
ndun innoyte suudu torordu Alla»,ⁿ kono onon on wattii ndu fammeere wuybe!»

¹⁴ Tawi bumbe e layoobe no badaade mo ka juulirde, o sellina be. ¹⁵ Kono bay
hooreebe *yottinoobe sadaka ben e jannoobe fii Sariya on ben yi'ii kaawakeeji
moyýí di o wadi din, e ko faybe ben ewnotoo kon ka juulirde mawnde wi'a
«Hosannaa*, yo bii Daawuuda», be seytini, ¹⁶ be wi'i mo: «A nanii ko be woni
wi'ude kon?»

Iisaa jaabii be: «Hiiyii, e hara haa hande on jangaali dii kongudi wonde: «Ko
kundule faybe ben e muynoobe ben hebirtaa mantoore?»»ⁿ

¹⁷ O acci be don, o yalti saare nden, o yahi *Betanii, o waali ton.

^m21.9 Zab. 118.25-26

ⁿ21.13 Isa. 56.7

ⁿ21.16 Zab. 8.3

Fii no Yibbehi kin Hudiraa

(*Mrk. 11.12-14, 20-26*)

¹⁸ Ko Iisaa yiltitotoo ka saare bimbi, o weelaa. ¹⁹ O yi'i yibbehi ka laawol, o 6adii ki. Kono ko kaaki tun o tawi e makki. Onsay o wi'i ki: «A rimitataa hande kadi.» E on saa'i don kisan yibbehi kin yoori.

²⁰ Bay taalibaabe ben yi'ii dün, 6e ɳaldfi, 6e wi'i: «Ko honno kii yibbehi yooriri kisan?»

²¹ Onsay Iisaa jaabii 6e, wi'i: «Ka haqiiqa mi andinii on, si tawii hidon gomdini, hara on sikkitaaki, wonaa ko wadaa e kii yibbehi kon tun wadoton. Kono kadi, si on wi'ii ngoo fello yo ngo 6oro doo, ngo yaha ka baharu, dün waday. ²² Kala ko landordon gomdinal e nder toragol Alla, on hebay.»

Lande fii Bawgal Iisaa ngal

(*Mrk. 11.27-33; Luk. 20.1-8*)

²³ Bawto dün Iisaa naati ka juulirde mawnde. E nder ko o jannata kon, hooreebe yottinoobe sadaka 6en e mawbe jamaa on ari, wi'i mo: «Ko e ley kongol hombo wondaa wadude fun, e ko e ley kongol hombo wondaa?»

²⁴ Iisaa jaabii 6e, wi'i: «Min kadi mi landoto on huunde wootere. Si on jaabike lan, onsay mi yeetoto on ko e ley kongol hombo mi woni wadirde dün. ²⁵ E hara lootugol ko Yaayaa lootaynoo yimbe 6en kon, ko honto iwri: ko ka arsi, kaa ko e neddanke?»

Kono 6e wi'indiri: «Si en jaabike mo ko ka arsi iwri, o wi'ay en ko hondun hadunoo gomdinen mo? ²⁶ Si en jaabike mo-le ko e neddanke dün iwri, haray hulen jamaa on.» (Ko fii fow no jogori Yaayaa wa annabaajo.)

²⁷ Onsay 6e jaabii Iisaa: «Men andaa!»

Kanko kadi o wi'i 6e: «Min kadi mi wowlantaa on ko e ley kongol hombo mi woni wadirde dün.»

Misal Yettaangal e Bibbe Dido

²⁸ Iisaa wi'i be kadi: «Ko hondun mijidon e dundoo? Hari goddo no mari bibbe dido. O wi'i arano on e ben: ‹Biddo an, yahu golloyaa hande ka ngesa an *wiijnu.›²⁹ On jaabii mo wi'i: ‹Mi woniraal!› Bawto dun o ninsiti, o yahi ka ngesa. ³⁰ Ben mabbe badii dimmo on kadi, o yamiriri on kadi wano non. Ondon jaabii wi'i: ‹Mido woniri dun, yo baaben!› Kono o yahaali. ³¹ Ko hombo e ben dido wadi faale baaba mun on?»

Be jaabii mo, be wi'i: «Ko arano on.»

Iisaa kadi wi'i be: «Ka haqiiqa mi andinii on, yantiroobe sagalle janfa ben e cagaabe ben attike on ka *laamu Alla. ³² Ko fii Yaayaa ariino e laawol feewungol, ronkudon mo gomdinde. Kono yantiroobe sagalle janfa ben e cagaabe ben gomdini mo. Onon non, ben yi'unoobe dun, on tuubaano bawto dun, gomdindon mo.»

Misal Yettaangal e Halfinaabe Ngesa Wiiju

(Mrk. 12.1-12; Luk. 20.9-19)

³³ «Hedee kadi misal goo: No woodunoo jom galteejo, tutunoodo *wiiju. O howi tutateeri ndin, o jasi ngayka fii ka wiiju on oyfée, o wadi bente ka reenoowo on wona, o halfini ndi remoobe wiiju ben, o yahi safaari. ³⁴ Bay saa'i sojitungol wiiju on hewtii, o immini kurkaadsi makko haa e remoobe wiiju ben fii yo be jonnu be bibbe wiiju.

³⁵ «Kono ben remoobe wiiju hendii din kurkaadsi, piyi goddo on, wari oya, be ferii goddo goo kaaye. ³⁶ O immini kurkaadsi makko goo kadi burbe beya aranun duudude, remoobe wiiju ben wadiri bendon kadi wano non. ³⁷ Ka sakkitorun o immini biddo makko on haa e mabbe, himo wi'a: ‹Be teddinay biddo an on.›³⁸ Kono bay remoobe wiiju ben yi'ii biddo on, be wi'indiri: ‹Ko oo woni

ronoowo on! Aree waren mo, d'un en hendoto ndondi makko ndin.³⁹ Onsay b'e nangi mo, b'e nabi ka baawo tutateeri wiijnu, b'e wari.»

⁴⁰ Iisaa wi'i kadi: «Jooni non, nde jom tutateeri wiijnu ndin ari, ko hondun o wadata ben remoobe wiijnu?»

⁴¹ Ben hooreebe jaabii mo, b'e wi'i: «O re'iray ben bonbe no yurmiri, onsay o halfina tutateeri ndin remoobe goo, hara ko jonnitoobe mo biibbe wiijnu ben ka dabbunde.»

⁴² Onsay Iisaa wi'i b'e: «E hara on jangaali haa hande ko bindi din wi'i kon? Ko fii hid'i wi'i wonde:

«Hayre nde mahoobe ben hawkunoo nden
wontii hittunde ka sobbundu.

Dun ko e Joomiraado on iwri,
dun no hawnii e gite men!»⁴³

⁴³ «Ko d'un wadi si mi wi'ay on, laamu Alla ngun yettitante on, ngu yedee jamaa wadaydo ko Alla yidi kon. ⁴⁴ Awa kala yanudo e nden hayre, o lancoto, kala kadi mo nde yani e hoore mun, o muncoto.»^p

⁴⁵ Bay hooreebe yottinoobe sadaka ben e *Fariisiyaabe ben nanii den mise, b'e andi ko fii mabbe Iisaa woni wowlude. ⁴⁶ Be woni e dabbugol feere no b'e nangira mo, kono hari hibe huli jamaa on, ko fii hari jamaa on no jogori mo wa annabaajo.

Misal Yettaangal e Saatinaabe e Peera

(Luk. 14.15-24)

22¹ Iisaa yewtiri b'e kadi misal, o wi'i b'e: ² «Laamu Alla ngun no wa'i wa lando, wadudo caatal fii peera biddo mun. ³ O nuli kurkaadi makko din yo noddoy saatinaabe ben ka caatal. Kono tawi ben faalaaka arude. ⁴ O nuli kadi kurkaadi

⁴³21.42 Zab. 118.22-23

^p21.44 Isa. 8.14-15

goo, o wi'i: <Yahee wi'on saatinaabe ben: Mi ebbindike fii caate den. Ga'oy an koy e daabeeji an fayudi din hirsamaa. Fow gasii. Aree ka caatal!>

⁵Kono be foygiti fii ngal caatal, be yahi, oya on ka ngesa mun, goddo on ka ngeygu mun. ⁶Beya heddiibe nangi kurkaadi din, tampini, wari. ⁷Lando on tikki. O immini suufaabe makko ben, o muloyi ben ittube ko'e, o sunni saare mabbe nden. ⁸Onsay o wi'i kurkaadi makko din: <Caatal ngal fewndike, kono saatinanoobe ben handaa e mun. ⁹Jooni, yahee ka date-cele, saatinon kala mo yi'udon ton ka caatal!>

¹⁰Onsay kurkaadi makko din yahi ka date, be mottindiri kala be be tawnoo ton, bonbe e moyyube, haa suudu ka caatal ngal wadata don heewi yimbe. ¹¹Bay lando on arii yi'ugol arube tawegol ben, o haynii don goddo mo bornaaki conci peera. ¹²Lando on wi'i mo: <Njaatigi an, ko honno waawirdaa arude doo, a bornaaki conci peera?> On neddo fanki. ¹³Onsay lando on wi'i kurkaadi din: <Habbee mo juude e koyde, bugodon mo ka niwre ka buri woddude, ka wullaandu e yatindiro niiye woni ton!>¹⁴Ko fii noddaabe ben no duudi, kono ko seedaabe subaa.»

Fii no Iisaa Ndarndoraa fii Yobugol Sagalle

(Mrk. 12.13-17; Luk. 20.20-26)

¹⁵Onsay *Fariisiyaabe ben yahi, fewjodi fii no be nangira Iisaa kongudi makko din. ¹⁶Be immini e makko taalibaabe mabbe ben, e yimbe *Heroodu ben, ben wi'i mo: «Karamoko, meden andi ko on nundube, hidon jannirde laawol Alla ngol goonga, awa kadi on denyotaako hay gooto, ko fii on furdindinaa yimbe ben.

¹⁷Yeetee men jooni ko miijidon: E hara no haani ka men yoba lando mawdo Roomu on sagalle, kaa haanaa?»

¹⁸Kono nde tawnoo Iisaa no andi miijooji mabbe bondi din, o jaabii be, o wi'i: «Ko fii hondun ndarndorton mi, faasiqiibe? ¹⁹Holley lan wuundu yobeteendu

sagalle.» Onsay ɓe yeebani mo *dinaruuru.²⁰ O landii ɓe, o wi'i: «Ko nandolla hombo e bindi hombo woni e mayru?»

²¹ Be jaabii: «Ko lando mawdo Roomu on.»

Onsay o wi'i ɓe: «Jonnitee lando mawdo Roomu on ko makko kon, jonniton Alla kadi ko mun kon.»²² Be ɣaldì fii kon ko ɓe nani, ɓe acci mo don, ɓe yahi.

Fii Sadduusiyaabe ɓen e Ummatal ngal

(Mrk. 12.18-27; Luk. 20.27-40)

²³ Nden jande tigi *Sadduusiyaabe, wi'ube wonde ummutal alaa ɓen, ari landii Iisaa,²⁴ ɓe wi'i mo: «Karamoko'en, Muusaa no wi'i wonde si godđo maayii, o accaali bibbe, haray mijjniraawo makko on no haani yettude on keynguujo mo o acci, fii no o hebirana on kotираawo makko jurriya.²⁵ Tawi no woodunoo hakkunde amen bibbe njeedido. Arano on jombi, maayi. Nde tawnoo o accaali jurriya, mijnan makko roni debbo on.²⁶ Dimmo on kadi woniri wano non, tammo on kadi wano non, haa ɓe njeedidoo non ɓe timmi.²⁷ Bawto mabbe ɓe fow, debbo on kadi maayi.²⁸ Bay hari ɓen njeedidoo non resii on debbo, ko hombo e ɓen on debbo wontanoyta ka ummutal?»

²⁹ Iisaa jaabii ɓe, wi'i: «Hidon e nder palji, ko fii on alaa faamude bindi din, on alaa faamude kadi bawgal Alla ngal.³⁰ Ko fii ka ummutal, worbe ɓen resataa, rewbe ɓen kadi resetaake, kono ɓe wa'ay wa malaa'ikaabe ɓen ka kammuuli.³¹ E on jangaali ko Alla daalani on kon fii ummutal maybe ɓen, wonde:³² «Ko min woni Alla Ibraahiima e Alla Issaaqa e Alla Yaaquuba?»^q Awa Alla wonaa Alla maybe ɓen, kono ko o Alla wurbe ɓen.»

³³ Jamaa hedinoodo on ɣaldì fii janndeeji di Iisaa jannaynoodin.

^q22.32 Egg. 3.6

Fii Yamirooje Burde Mawnude ðen

(*Mrk. 12.28-34; Luk. 10.25-28*)

³⁴ Bay Fariisiyaabe ðen humpitike wonde o fankinii Sadduuusiyaabe ðen, þe mottondiri. ³⁵ Goddo e maðbe, waawudo fii Sariya on, landii mo ðundoo fii ndarndagol mo, o wi'i: ³⁶ «Karamoko'en, ko yamiroore honde buri mawnude ka Sariya?»

³⁷ Iisaa jaabii mo, wi'i: «Yo a yidir Alla Joomiraado maa on bernde maa nden fow e wonkii maa kin fow e hakkil maa kin fow.^{r38} Ko dun woni yamiroore aranere nden e mawnde nden. ³⁹ E hino dimmere nden ko wa mayre: Yo a yidir nokondo maa on wano yidirdaa hoore maa non.^{s22.3940} Ko e dee yamirooje doo didi Sariya on fow e annabaabe ðen tippi.»

Fii Hakkunde Almasiihu on e Daawuuda

(*Mrk. 12.25-37; Luk. 20.41-44*)

⁴¹ Nde tawnoo Fariisiyaabe ðen no moobondiri, Iisaa landii þe ðundoo, ⁴² o wi'i: «Ko hondun miijidon fii *Almasiihu on, ko o jurriya hombo?»

Be jaabii mo: «Ko Daawuuda.»

⁴³ Onsay Iisaa wi'i þe: «Ko honno Daawuuda noddiri mo Joomi? Bay ko Ruuhu Allaahu on ardi mo fewndo o wi'i:

⁴⁴ Joomiraado on daalani Joomi an on:

Joodor ka sengo an jaamo,
haa mi wada aybe maa ðen ka ley teppe maa.^t

⁴⁵ «Si Daawuuda tigi wi'ii Almasiihu on (Joomi), haray ko honno non Almasiihu on woniri jurriya makko?»

^{r22.37} Yaj. 6.5

^{s22.39} Lew. 19.18

^t22.44 Zab. 110.1

⁴⁶ Laatii hay gooto waawaali mo jaabaade hay kongol. Gila nden nande hay gooto suusaali landaade mo.

Fii no Iisaa Feliri Hooreebe Diina ben

(*Mrk. 12.38-39; Luk. 11.39-52; 20.45-46*)

23 ¹Onsay Iisaa yewti jamaa on e taalibaabe mun ben, ² o wi'i: «Ko jannoobe fii Sariya on ben e *Fariisiyaabe ben newnanaa jannugol fii Sariya Muusaa on. ³ Awa doftee, wadon kala ko be wi'i on, hara on wadiraali wa kuude mabbeden. Ko fii be wowlay, hara be wadataa. ⁴ Hibe habba dolle teddude, mettude nabude, be fawa de e hoore balbe yimbe ben, hara kambe tigi be faalaaka de memminirde hay hoore hondu fii wallugol be. ⁵ Kuude mabbe de be wadata den fow ko fii yo yimbe ben yi'anbe. Awa kadi hibe yanja *paaloy bindi mabbe koy^u, be juutina binsanji conci mabbe.^{w6} Hibe yidi ndaddule arane den ka nafagol e saffeeji arani din ka juulirde, ⁷ e hiwreede ka fottirde. Hibe yidi kadi yo yimbe ben noddir be karamoko'en.

⁸ Kono onon, wota on wadu haa noddedon karamoko, ko fii ko gooto woni Karamoko mon, onon on fow ko on musibbe. ⁹ Awa kadi, wota on noddu hay gooto baaba ka hoore leydi doo, ko fii ko gooto woni Ben mon, dun-le ko on Wondo ka kammu. ¹⁰ Wota on wadu haa noddedon yeesoojo, ko fii ko gooto woni Yeesoojo mon on, on-le ko *Almasiihu on. ¹¹ Yo burdo teddude on e hakkunde mon wonu kurkaadu mon. ¹² Ko fii mawnintiniido woo jippinoyte, jippindo hoore mun woo kadi mawninoyte.

¹³ «Bone wonanii on, yo faasiqibe, dun ko onon jannoobe fii Sariya on e Fariisiyaabe ben, bay hidon falande yimbe ben laamu kammu ngun, hara on naatataa, on accataa faalaabe naatude ben naata.

^u23.5 Yaj. 6.8

^w23.5 Ada. 15.38

¹⁴ «Bone wonanii on, yo faasiqiibe, dun ko onon jannoobe fii Sariya on e Fariisiyaabe ben, bay hidon jatta galleeji keynguube, hidon juutina julde fii yiingo. Sabu dun on heboyay naawooje burde sattude.

¹⁵ «Bone wonanii on, yo faasiqiibe, dun ko onon jannoobe fii Sariya on e Fariisiyaabe ben, bay hidon jinda ka baharu e ka leydi fii silmingol gooto. Nde on silmi, wadon mo biddo jahannama nde laabi didi buri ko mon kon!

¹⁶ «Bone wonanii on, yo bumbe dowoobe, wi'a: <Si goddo woondirii *juulirde mawnde nden, haray hinaa huunde. Kono si goddo woondirii kajye juulirde mawnde nden, haray dun farlike mo.>¹⁷ Ko onon yo njofoobe e bumbe! Ko hondun buri mawnude hakkunde kajye den e juulirde mawnde labbinnde kajye den nden? ¹⁸ Maadun hidon wi'a: Si goddo woondirii *layyorde nden, haray dun hinaa huunde, kono si goddo woondirii ko sakkaa kon ka hoore layyorde, haray dun farlike mo. ¹⁹ Ko onon yo bumbe, ko hondun buri mawnude hakkunde ko sakkaa kon e layyorde labbinaynde ko sakkaa kon? ²⁰ Awa, kala on woondirdo layyorde nden, haray o woondirii nde, kayre e kala ko woni e mayre. ²¹ Awa kadi kala woondirdo juulirde mawnde nden, haray o woondirii nde, kayre e Hodudo e mayre on. ²² Kala woondirdo kammu ngun kadi, haray o woondirii jullere laamu Alla nden e Joodido e mayre on.

²³ «Bone wonanii on, yo faasiqiibe, dun ko onon jannoobe fii Sariya on e Fariisiyaabe ben, bay hidon ittana naana e suukooran e namaku farilla, hara hidon welsindanii ko buri hittude kon ka Sariya, dun ko peewal ngal e yurmeende nden e sella-findeyaagal ngal. Hara-le ko dun haanunodon jokkude, tawa kadi on welsindaaki e ko heddi kon. ²⁴ Ko onon yo bumbe dowoobe, sukkitoobe buubii ka yarata, hara-le on moday ngelooba!

²⁵ «Bone wonanii on, yo faasiqiibe, dun ko onon jannoobe fii Sariya on e Fariisiyaabe ben, bay ko baawo miranji din tun labbinton, hara hidi heewi miile e

angal waawugol hoore mun.²⁶ Ko onon yo Fariisiyaabe bumbe, adee labbinon taho nder miranji din, fii no baawo on kadi laabira.

²⁷ «Bone wonanii on, yo faasiqiibe, dun ko onon jannoobe fii Sariya on e Fariisiyaabe ben, bay hidon wa'i wa genaale rawninaade fotude e kene, hara nder majje on no heewi tew yi'e maybe e kala noone tuundi.²⁸ Onon kadi ko nii! Ka kene hidon wa'ani yimbe ben wa feewube, kono hara ka nder hidon heewi faasiqankaaku e angal peewal.

²⁹ «Bone wonanii on, yo faasiqiibe, dun ko onon jannoobe fii Sariya on e Fariisiyaabe ben, bay hidon maha maandina genaale annabaabe ben, para kadi maandeeji genaale feewube ben,³⁰ hara kadi hidon wi'a: «Si tawno meden woodanoo e tawnde baabiraabe amen ben, men wontidataano e mabbe fii hibbugol yiyan annabaabe ben.»³¹ Ko nii wondon seeditorde e hoore mon tigi, wonde ko on bibbe ben warunoobe annabaabe ben.³² Awa juurinee sariyaare baabiraabe mon ben!

³³ «Ko onon, yo bolle, iwdi kuura! Ko honno non dadirton donkinireede jahannama?³⁴ Ko dun wadi si mido nabande on annabaabe e faamube e jannoobe, waroyon wobbe, fempon wobbe, foccon beya ka juulirde mon, cukkodon be gila e saare hebi e saare,³⁵ fii yo yiyan kala feewudo hibbaadan yantu e hoore mon, dun non ko gila e yiyan Haabiila dan, on feewudo, haa addani e yiyan Zakariyaa, oo biddo oo wi'eteedo Berekiiya, on mo warunodon hakkunde layyorde nden e juulirde mawnde nden,³⁶ ko fii ka haqiiqa mi andinii on, dun fow yantoyay e hoore nguu jamaanu.

³⁷ «Ee Yerusalaam! Ee Yerusalaam! Ko an yo saare sahinbinoore annabaabe, wariroore nelaabe e mun kaaye! Ko haa honto mi faalanoo moobude bee faybe maa wano gertogal moobirta coppi e ley gabitti mun, e hin-le on jabaali dun!

³⁸ Awa nokkuure mon nden eggaama, nde caabii!³⁹ Ko fii mi andinii on, on yiitataa

lan haa nande wi'oyton: «Yo barki wonan oo wondo arude e innde Joomiraado on!»^y

Maandeeji fii Artoygol Iisaa Almasiihu on

(*Mrk. 13.1-2; Luk. 21.5-6*)

24¹ Bay wonii Iisaa fokkitii yaltude ka *juulirde mawnde, taalibaabe makko ben badii mo fii hollugol mo darnoodi juulirde nden. ² Kono o jaabii ɓe, o wi'i: «On yi'ii dun fow? Ka haqiiqa mi andinii on, hay hayre e hoore hayre luttoytaa doo ko lancaaka.»

³ Onsay o joodoyii ka Fello *Zaytuuni. Taalibaabe ɓen ari tawi mo e gundoo, ɓe wi'i mo: «Yeetee men, ko honde tuma d'un wadoyta, e ko hondun wonoyta maande aroygol mon ngol e lannoode aduna on?»

⁴ Iisaa jaabii ɓe, wi'i: «Reenee fii wota gooto faljin on, ⁵ ko fii buy aroyay baarora innde an nden, hara no wi'a ko kajun woni *Almasiihu on. Awa ɓen faljinoyay yimɓe duudube. ⁶ On nanoyay kadi fii hareeji no wowlee, e haalaaji fii gereeji. Awa wota on hulu, ko fii bee d'un wada. Kono hinaa don wonata lannoode nden. ⁷ Hareeji kadi wadoyay hakkunde ley়ি din. Laamateeriji din kadi immondirana, nokkeeli goo heegeeji wada, kajun e dimbande leydi. ⁸ Kono ko dun fow wonata fuddoode sattendeesi nanditaydi e muuseendi njata din.

⁹ «Awa ɓe wattoyay on e juude tampinoobe ɓen, ɓe wara on. Ley়ি din fow kadi ajna on sabu innde an nden. ¹⁰ Buy seloyay gomdinal ngal, ɓe janfondira, ɓe ajindira. ¹¹ Awa waditiibe annaba duudube yaltitoyay, ɓe faljina yimɓe buy. ¹² Sabu ɓeydagol angal peewal ngal, giggol duudube duytoyo, ¹³ kono kala njanniido haa ka lannoode, o dandoyte. ¹⁴ Oo Kibaaru Moy়o fii *laamu Alla ngun fejninte e aduna on fow, fii no ley়ি din fow nanira seeditoore nden. Ko onsay aduna on lannata.

^y23.39 Zab. 118.26

¹⁵ «Awa, nde yi'udon huunde harmunde caabinaynde nde annabi Danu'iila wowlunoo fii mun nden daakanike nokkuure hormorde nden woo^y, (haray yo jangoowo on faamu), ¹⁶ onsay yo hodube ka diwal Yahuuda ben dogir ka pelle.

¹⁷ On wondo ka fowtorde hoore suudu mun wota tippano ko woni kon ka nder suudu. ¹⁸ On wondo kadi ka ngesa wota yiltito fii yettugol dolokke mun on. ¹⁹ E nder den baldedon, bone wonanay sowiibe ben e muyninaybe ben. ²⁰ Awa toree fii wota ndun dogudu mon ardu ndungu maa e *jalaande fowteteende e mun nden.

²¹ Ko fii onsay satteende mawnde waday, nde sifa mun wadaali gila aduna dawi haa hande, e nde buri mun waditataa han kadi. ²² Si tawno den jalaade rabbindinanooka, hay gooto dadataano. Kono sabu subaabe ben, den jalaade rabbindinte.

²³ «Awa si goddo aru on e wi'oyde wonde: ‹Almasiihu on no doo!› maa ‹himo daa!›, wota on hoolo mo. ²⁴ Ko fii waditiibe almasiihu e waditiibe annaba feenoyay, be wadoya maandeeji njani e kaawakeeji fii no be faljinira hay subaabe ben, si no gasaynood. ²⁵ Awa mi *hiitanike on fii dun.

²⁶ «Awa si be wi'ii on: ‹E hino himo ka wulaa›, wota on yahu, maa: ‹Himo ka nder cuudi›, wota on hoolo! ²⁷ Awa ko wano mayande mayirta non iwra ka funnaange, jalba haa ka hirnaange, ko wano non ardu *Bii-Aaden on wonirotya. ²⁸ Ko ka ko maayi kon woni woo, jigaaje den moobotoo.

²⁹ «Kisan bawto satteende den jalaade, ‹Naange ngen nibbitay, tawa lewru ndun jalbataa, koode den ka kammu kadi yana, ko tiidi kon ka kammu kadi dimboyoo.›^z

³⁰ «Ko onsay maande Bii-Aaden on feenata ka kammu, bolondaaji din fow ka hoore leydi fesa, be yi'oya non Bii-Aaden on no ara e duule iwrude ka kammu, hara himo arda e bawgal e mangural mawngal. ³¹ Onsay o nuliroya malaa'ikaabe makko ben hito moolanaango *liital, be mooba subaabe makko ben, gila

^y24.15 Dan. 9.27, 11.31, 12.11

^z24.29 Isa. 13.10 e 34.4

funnaange hebi hirnaange e gila nano hebi naamo, gila ka kammuuli din fuddi haa ka di haadi.

³² «Yo misal yibbehi kin wonan on gandal. Nde caldi makki din heccidiri, di wiliti, on andanay hoore mon wonde setto ngon badike. ³³ Ko wano non kadi, no yiirudon dii piiji fow no wada woo, haray andee wonde Bii-Aaden on badike ka dambugal. ³⁴ Ka haqiiqa mi andinii on, dun fow waday ado nguu jamaanu feyfude. ³⁵ Kammu ngun e leydi ndin feyfay, kono min kongudi an din feyfataa.»

Fii Hebulanagol Saa'i Artoygol Bii-Aaden on

(Mrk. 13.32-37; Luk. 17.26-36)

³⁶ «Kono hay gooto andaa fii nden jalaande e on saa'i, hinaa hay malaa'ikaabe ben ka kammuuli, hinaa hay Biddo on, kono ko Baabaajo on tun andi fii nden jalaande e on saa'i. ³⁷ Ko wadunoo kon fewndo jamaanu Nuuhu, wadoyay kadi ka jalaade ado artugol Bii-Aaden on. ³⁸ Ko fii, e dee jalaade ado waamere nden wadude, hari yimbe ben no jaamaynoo yara, no jomba jombanee, haa jande Nuuhu naatunoo ka laana. ³⁹ Be sogitaaki hay huunde haa nde waamere nden arnoo, nde yooli be be fow. Ko wano non wonirotya ardu Bii-Aaden on.

⁴⁰ «Onsay yimbe dido wondube e ngesa woota, goddo e mabbe yettete, oya on lutta. ⁴¹ Wano non kadi, rewbe dido wonbe unidude, goddo e mabbe yettete, oya on lutta. ⁴² Awa wattanee yiila, ko fii on andaa ko e jalaande honde Joomiraado mon on aroyta. ⁴³ Ko fii andee fota, si tawno jom galle no andunoo nde ngujjo on araynoo wujjugol e nder jemma on, o wattanayno yiila, hara o accaali galle makko den fusee. ⁴⁴ Ko dun wadi, onon kadi hebilee, ko fii Bii-Aaden on aroyay e saa'i nde on sogitaaki.»

Fii Golloowo Holniido e Golloowo Bondo

(Luk. 12.41-48)

⁴⁵ «Hara ko jiyaado hombo reeniido holniido woni ko jom mun halfinta neemingol kurkaadi mun din e saa'i haanudo? ⁴⁶ Maloore wonanii on jiyaado, mo jom mun ari tawi no jokkiri non. ⁴⁷ Ka haqiiqa mi andinii on, o halfinay mo jawle makko den fow. ⁴⁸ Kono si tawii on jiyaado ko bondo, wi'oowo: ‹Jom an neebii araali›, ⁴⁹ onsay, o nangana tilfugol dimmoobe makko ben, hara kanko himo naama yarida e mandiloobe ben, ⁵⁰ jom on jiyaado aray nde on jiyaado sabbaaki mo, e saa'i mo o sogitaaki, ⁵¹ o letta mo lette sattude, o wada mo ka faasiqiibe ben wadetee ton, ka wullaandu e ȝatindiro jiiy e woni ton.

Misal Yettaangal e Jiw e Sappo

25 ¹ «Awa laamu kammu ngun no wa'i wa nde jiw e sappo yetti lampuuji mun, yahi fii fottoygol e jom jomba. ² Tawi njowo e ma be ko njofoobe, b ya njowo ko faamube. ³ Ko njofoobe ben yettata lampuuji mun din,  e ronki naborde nebban ko  e hubbinira di, ⁴ kono faamube ben kajun ardi e lampuuji e tindohoy nebban. ⁵ Nde tawnoo jom jomba neebii, fow soy ii daanii.

⁶ «Bay wonii tumbere jemma, ewnaa: ‹E hino jom jomba! Yaltee fii ja bagol mo!› ⁷ Onsay ben jiw e immii,  e e bindanii lampuuji ma be din. ⁸ Njofoobe ben wi'i faamube ben: ‹Okkoree men nebban, ko fii lampuuji amen din no e fii daanagol!› ⁹ Faamube ben jaabii  e, wi'i: ‹Oo'o, dan yonataa! Yahee soodoyon ka yeeyoobe ben.›

¹⁰ «Fewndo ko  e yahi soodoygol, jom jomba hewti. Hebulinoobe ben naatidi e makko ka peera, baafe den ombaa. ¹¹ Bay nettii, b ya jiw e kadi ari,  e wi'i: ‹Koohoojo, Koohoojo, udditanee men!› ¹² Kono o jaabii  e, o wi'i: ‹Ka haqiiqa, mi andaa on!›»

¹³ Onsay Iisaa wi'i: «Awa wattanee yiila, ko fii on andaa nalaande e saa'i nde mi arata.»

Misal Yettaangal e Kurkaaduube Tato

(Luk. 19.11-27)

¹⁴ «Laamu Alla ngun no wa'i kadi wa neddo fokkitudo safaari. O noddi kurkaduube mun, o halfini ɓe jawle makko den.¹⁵ O jonni goddo on *talanji jowi, o jonni oya talanji didi, o jonni tammo on talanru wooturu, mo bee e taaqa mun, onsay o yahi e safaari makko.¹⁶ Don kisan hendiido talanji jowi din yahi gollitiroyi di, o heboyi talanji jowi e hoore majji.¹⁷ Wano non kadi hendiido talanji didi on, o hebi e hoore majji talanji didi.¹⁸ Kono hedinoodo talanru wooturu on, o yahi, o jasi ngayka, o iri mbuudi jom makko din.

¹⁹ «Bay neeboyii, jom ɓen kurkaaduube arti. O landitii ɓe ko honno ɓe golliri.

²⁰ Hedinoodo talanji jowi on badii, o addidi di e talanji jowi goo kadi, o wi'i: «Koohoojo, on acciranno talanji jowi, awa e hino talanji jowi kadi ko mi hebi e hoore majji kon.»²¹ Jom makko wi'i mo: «A wadii ko moyyi, yo kurkaadujo moyyo holniido. Ko fii a nundii e hoore ko fandi, mi wadete e hoore ko duudi. Weltodu e jom maa!»

²² «Hedinoodo talanji didi on kajun kadi badii, wi'i: «Koohoojo, on acciranno talanji didi, e hino talanji didi ko mi hebi e hoore majji kon.»²³ Jom makko wi'i mo: «A wadii ko moyyi, yo kurkaadujo moyyo holniido. Ko fii a nundii e hoore ko fandi, mi wadete e hoore ko duudi. Weltodu e jom maa!»

²⁴ «Hedinoodo talanru wooturu on kajun kadi badii, wi'i: «Koohoojo, bay mido andunoo ko a neddo sattudo fii, sonitoowo ko a aawaa e wa'oowo ko a sankaa,

²⁵ mi huli, mi yahi, mi iroyi talanru maa ndun ka nder leydi. E hino ndu, jabu ko jeydaa kon.»

²⁶ «Jom makko jaabii mo wi'i: <Ko an yo jiyaado bondo puydo! E hida andunoo mi sojnitay ko mi aawaa, maa mi wa'ay ko mi sankaa? ²⁷ Awa, hida haanunoo accude mbuudi an din e juude gollitiroobe di ben^a, dun, nde mi artunoo woo, mi hettayno di mi jeynoodin e hoore tono!>

²⁸ «Onsay jom makko wi'i: <Jabitee di e juude makko, jonnon di oo jogiido talanji sappo din! ²⁹ Ko fii ko mardo on beydantee haa duuda, kono mo maraa on jabitante hay yero ko o mari kon. ³⁰ Awa, jiyaado fussaaqijio on, bugee mo ka niwre ka buri woddude, ka wullaandu e ɣatindiro niiyé woni ton!>>

Fii Naawoore Sakkitorde nden

³¹ «Tuma *Bii-Aaden on ardoi e mangural mun ngal, wondude e malaa'ikaabe ben fow, o joodoyto ka jullere makko laamu darjinnde. ³² Onsay leyýí din fow mottindirte yeeso makko. O sendindira yimbe ben, wano ngaynaako sendindirirta baali e be'i. ³³ O wadira baali din ka sengo makko jaamo, be'i din ka sengo makko nano.

³⁴ «Onsay Lando on wi'ay wonirbe ka sengo mun jaamo ben: <Aree, yo ɓe Ben an barkini! Hendodon ndondi laamateeri ebbananoondi on ndin gila ka fuddoode aduna on. ³⁵ Ko fii mi weelano, okkordon mi ko mi jaama, mi dondono, okkordon mi ko mi yara, mi wonno kodo, wernudon mi, ³⁶ mi holi, holtindon mi, mi nawi, dankidon mi, mi sokaa, ndaarudon mi.>

³⁷ «Onsay feewube ben jaaboyto mo, wi'a: <Joomi, ko honde tuma men yi'u-maa hida weelaa, men okkor-maa ko jaamaa, maa ka dondadaa, men okkor-maa ko yaraa? ³⁸ E ko honde tuma men yi'u-maa ko a kodo, men wernu-maa, e ka holudaa, men holtin-maa? ³⁹ E ko honde tuma men yi'u-maa hida nawni, maa hida sokii, men yahi e maa?>⁴⁰ Onsay Lando on jaaboto ɓe, wi'a: <Ka haqiiqa mi andinii

^a25.27 Accugol mbuudi e «juude gollitiroowo di on», no firi wallingol di ka «banki».

on, nde tawnoo on wadanii dun burdo fandude e musibbe an ben, tawi ko min wadandon dun.»

⁴¹ «Bawto dun o wi'a wontirbe ka nano makko ben: <Pottitee lan, yo hudaabe, yahee ka yiite poomayankeeewe ebbanaange Ibuliisa e malaa'ikaabe mun. ⁴² Ko fii mi weelano, on okkoraano lan ko mi jaama, mi dondaa, on okkoraali lan mi yara, ⁴³ mi woni kodo, on wernaali lan, mi holi, on holtinaali lan, mi nawni, mi sokaa, on ndaaraali lan!»

⁴⁴ «Onsay kambe kadi be jaaboyto, be wi'a: <Joomi, ko honde huma men yi'u-maa hida weelaa, maa hida dondaa, maa ko a kodo, maa hida holi, maa hida nawni, maa e kasoo, men wallaali ma?»

⁴⁵ «Onsay o jaaboyto be, o wi'a: <Ka haqiiqa mi andinii on, nde tawnoo on wadanaali dun goddo e bee burbe fandude, tawi ko min woni on wadanaali dun!»⁴⁶ Ben non nawrete ka lette poomayankeeje. Kono feewube ben nawrete ka *ngurndan poomayankejan.»

Fii no Hooreebe Diina ben Haldiri Janfagol Iisaa

(Mrk. 14.1-2; Luk. 22.1-2; Yhn. 11.45-53)

26 ¹ Bay wonii Iisaa gaynii din yewtereeji fow, o wi'i taalibaabe makko ben: ² «Hidon andi si balde didi feyyi, *Juldeere Yawtaneede nden waday, awa *Bii-Aaden on wattete e joge fii yo o fempe e *leggal altindiraangal.»

³ Tawi onsay hooreebe *yottinoobe sadaka ben e mawbe jamaa on no moobondiri ka nder tata yottinoowo mawdo sadaka on, dun ko oo wi'eteedo Qayaafa. ⁴ Be haldi nangirgol Iisaa yoyre, be wara. ⁵ Kono fow e mun be wi'i: «Hinaa ka fewndo juldeere, fii wota murtaldu wadu e hakkunde jamaa on.»

Fii no Debbo Juuriri Nebban ka hoore Iisaa

(*Mrk. 14.3-9; Yhn. 12.1-8*)

⁶Nde tawnoo Iisaa no ka saare *Betanii, ka suudu Sim'uunu, oo nawnunoodo damajan, ⁷debbo ari tawi mo kanko Iisaa. Tawi on debbo no jogii tindohun hayre daneere tew angiri satta-cogguuri. Wa fewndo ko Iisaa joodii fii nafagol, kanko debbo on o juuri angiri ndin ka hoore Iisaa.

⁸Bay wonii taalibaabe ben yi'ii dün, ɓe seytini, ɓe wi'i: «Ko hondun woni nafa ndee bonnere? ⁹En waawayno yeeyude ndii angiri ko satti, jonna coggu mayri on miskinbe ɓen.»

¹⁰Bay Iisaa andii dün, o wi'i ɓe: «Ko hondun sattinanton oo debbo? Ko fii ko kuugal moyyal o wadanimmi. ¹¹Miskinbe ɓen kan, hidon wondi e mabbe soono woo, kono min, on wodataa e an soono woo. ¹²Ko o hibbiri ndii angiri ka bandu an, ko fii no mi hebulanora surreede. ¹³Ka haqiqiqa mi andinii on, kala ka oo Kibaaru Moyyo fejjinaa e aduna on, fii koo ko oo debbo wadi kadi sifete, o anditanee.»

Fii no Yudaasi Janfori Iisaa

(*Mrk. 14.10-11; Luk. 22.3-6*)

¹⁴Onsay goddo e *sahaabaabe Iisaa ɓen sappoo e dido, dün ko Yudaasi Iskariiyu, yahi ka hooreebé yottinoobe sadaka ɓen, ¹⁵o wi'i: «Ko hondun waawoton mi okkude, mi watta Iisaa e juude mon?» Be limani mo tammaaji cappande tati kaalisi.^{b16} Gila ontuma himo dabbebude feere no o wattira Iisaa e juude mabbe.

^b26.15 Zak. 11.12

Fii Nafakka Juldeere Yawtaneede nden

(*Mrk. 14.12-26; Luk. 22.7-23; Yhn. 13.21-30*)

¹⁷ Ka nallal aranal *Juldeere Bireedi de Aldaa e Lewen den, taalibaabe ben ari, wi'i Iisaa: «Ko honto faaladon yo men moyýinanoy on nafakka Juldeere Yawtaneede nden?»

¹⁸ O jaabii be, o wi'i: «Yahee ka saare haa ka kaariijo, wi'on mo: «Karamoko'en wi'ii woo: Saa'i maabbe on badike, ko ka mon be juulidata e taalibaabe maabbe ben Juldeere Yawtaneede nden.»»

¹⁹ Taalibaabe ben wadoyi ko Iisaa yamiri be kon, be moyýini nafakka juldeere nden.

²⁰ Bay nibbii, kanko Iisaa o badii fii nafagol, wondude e sappoo e didooobe ben.

²¹ E nder ko be jaamata kon, o wi'i: «Ka haqiiqa mi andinii on, goddo e mon janfoto lan.»

²² Be aani fota. Onsay mo bee e maabbe woni e wi'ugol mo: «E hara Koohoojo, ko min?»

²³ O jaabii be, o wi'i: «Ko on mo mi yollidi jungo e miran gooto janfoto lan.

²⁴ Awa Bii-Aaden on no yahude wano fii makko windori non, kono bone wonanii on janfotoodo Bii-Aaden on. Ko burnoo moyýande on neddo ko si o jibinanooka!»

²⁵ Onsay Yudaasi, dun ko janfotoodo mo on, yetti haala kan, wi'i: «Karamoko'en, e hara ko min?»

Iisaa jaabii: «Ko wano wi'irdaa non!»

²⁶ E nder ko be jaamata kon, Iisaa yetti bireedi. Bay o gaynii du'aade, o tayiti, o jonni taalibaabe ben, e hoore himo wi'a: «Jabee jaamon, dundoo ko bandu an ndun nii.»

²⁷ O yetti kadi jardukun wadorkun njaram, o jarni Alla, o jonni be, e hoore himo wi'a: «On fow yaree. ²⁸ Ko fii dun ko yiyan an dan nii, yiyan *ahadi hibboyteedan

dan fii yaafuyee junuubaaji duudube. ²⁹ Mi andinii on, mi yaritataa hande kadi njaram bibbe *wiijnu haa jande mi yaridoyta e mon njaram wiijnu kesan ka laamateeri Baaba an.»³⁰ Bay wonii be beytii beyti Zabuura, be yahi ka Fello *Zaytuuni.

Fii no Iisaa Hiitor i fii Yeddanne Petruusu nden

(Mrk. 14.27-31; Luk. 22.31-34; Yhn. 13.36-38)

³¹ Onsay Iisaa wi'i be: «E nder oo jemma, on fow on selay lan, ko fii no windii: «Mi waray ngaynaako on, wuro baali ngon saakoo.»³² Kono tuma mi immintinaa, mi hikkanto on yeeso, tawoyon mi Jaliilu.»

³³ Onsay Petruusu yetti haala kan, wi'i mo: «Hay si fow selay on, min non mi selataa on few.»

³⁴ Onsay Iisaa jaabii mo, wi'i: «Ka haqiiqa mi andinii ma, e oo jemma tigi, ado ndonto yoggude, haray a yeddi fii an laabi tati.»

³⁵ Petruusu jaabii mo kadi, wi'i: «Hay si tawii bee mi maayida e mon, mi yeddataa fii mon few!» Taalibaabe ben fow kadi wi'iri non.

Fii no Iisaa Torori Alla ka wi'eteen don Jatsaymaani

(Mrk. 14.32-42; Luk. 22.39-46)

³⁶ Bawto dun Iisaa yaadi e mabbe e ndee nokkuure wi'eteende *Jatsaymaani, o wi'i taalibaabe ben: «Joodee doo haa mi wodditoo fii toragol.»³⁷ O nabori Petruusu e bibbe Zabadii ben dido. Onsay o fuddii hebude annde e sokola,³⁸ o wi'i be: «Wonkii an kin no aani haa e mayde. Wonee doo, hiiren.»

³⁹ Onsay o yahi yeeso seeda, o sujji, o torori nii, o wi'i: «Baaba an, si no gasa, yo kun jardukun tampere pottito lan. Kono non wota faale an on wadu, kono yo faale maa on wadu.»

^c26.31 Zak. 13.7

⁴⁰ O artoyi e taalibaabe ben, o tawi be daanike. O wi'i Petruusu: «Jaka on waawaali hiiridude e an hay saa'i gooto? ⁴¹ Hiiree torodon fii wota on naatu e jarrabi. Wonkii kin no yidi wadugol ko moyyi, kono bandu ndun no lo'i.»

⁴² O wodditii be kadi dimmun, o torori nii, o wi'i: «Baaba an, si tawii gasataa ka kun jardukun tampere pottitoo lan, hara mi yaraali kun, yo faale maa on wadu.»⁴³ O artoyi kadi, o tawi be daanike, ko fii hari gite mabbe den teddii. ⁴⁴ O acci be don, o yahi, o wodditii be kadi, o torii kadi tammun, o fillitii din kongudi.

⁴⁵ Onsay o arti e taalibaabe ben, o wi'i be: «E ondaani kadi, fowtidon? Awa jooni saa'i on badike, Bii-Aaden on no watteede e juude junuubanke'en. ⁴⁶ Immee mahen, ko fii wondo janfaade lan on badike!»

Fii no Iisaa Nangiraa

(Mrk. 14.43-50; Luk. 22.47-53; Yhn. 18.3-12)

⁴⁷ E nder ko o yewtata kon, hawrondiri Yudaasi, tawdaado e sappoo e didoobe ben, hewtidii e jamaa duududo jogiido kaafaaje e bedi, immorde e hooreebe yottinoobe sadaka ben e mawbe jamaa on. ⁴⁸ Tawi wondo mo janfaade on wadaniino be ndee maande doo, o wi'i: «Mo mi hirbii woo, haray ko on. Nangee mo.»⁴⁹ Tun o badii Iisaa, e hoore himo wi'a: «On jaaraama karamoko'en!» Onsay o hirbii mo.

⁵⁰ Iisaa wi'i mo: «Gido an, wadu ko ardaa wadugol kon.» Onsay ben yimbe badii, fawi Iisaa juude, be nangi mo. ⁵¹ Tun, goddo e wondunoobe e Iisaa ben fonti jungo, sorti kaafa mun kan, o soppi kurkaadu yottinoowo mawdo sadaka on, o itti mo nowru ndun. ⁵² Onsay Iisaa wi'i mo: «Wattu kaafa maa kan ka wonnoo don, ko fii yettube kaafa ben fow, ko kaafa mulirtee. ⁵³ Kaa a sikku mi waawataa toraade Ben an ballal, o addanammi kisan buri koneeli sappoo e didi malaa'ika? ⁵⁴ Kono si dun wadii, haray ko honno ko bindi din wi'i kon laatorta? Bay ko di wi'i kon ko nii haani wonirde!»

⁵⁵ Onsay Iisaa wi'i jamaa on: «Hidon ardi e kaafaaje e bedi fii nangugol lan, wa si ko ngujjo arandon? E hin-le jnande woo mido joodii ka *juulirde mawnde, mido janna, on nangaali lan. ⁵⁶ Kono fun fow ko wadiri ko fii ko annabaabe ben windunoo kon yo laato.» Onsay taalibaabe ben fow acci modon, dogi.

Fii no Iisaa Addiraa Yeeso Hooreebe Diina ben

(*Mrk. 14.53-65; Luk. 22.54, 63-71; Yn 18.12-14, 19-24*)

⁵⁷ Onsay nangube Iisaa ben nabi mo ka yottinoowo mawdo sadaka on, dun ko Qayaafa, ka jannoobe fii Sariya on e mawbe ben mottondiri don. ⁵⁸ Tawi Petruusu no iwtiri baawo makko ka wodditii haa ka tata yottinoowo mawdo sadaka on. O naati, o joododi e aynoobe ben fii andugol ko honno dun wattinirta.

⁵⁹ Tawi hooreebe yottinoobe sadaka ben e dental fewjoobe ben fow no dabba seedeeji fenaandeeji goo e hoore Iisaa fii no be warira mo, ⁶⁰ kono be hebaali, fii kala seeditotoobe penaale duudube arii.

Kono bawto dun yimbe dido ari, ⁶¹ be wi'i: «Oo wi'ii no waawi lancude juulirde Alla mawnde nden, darnitoo nde e nder balde tati.»

⁶² Onsay yottinoowo mawdo sadaka on immii, wi'i mo: «A jaabotaako hay huunde e ko bee woni seeditaade e hoore maa kon?» ⁶³ Kono Iisaa fanki.

Yottinoowo mawdo sadaka on wi'i mo: «Mi woondinirii ma Alla Wuurudo on, yeeto men si ko an woni *Almasiihu on, dun ko *Biddo Alla on.»

⁶⁴ Iisaa jaabii mo wi'i: «Ko wano wi'irdaa non. E hoore dun mi andinii on, gila jooni on yi'ay Bii-Aaden on no joodii ka sengo jaamo Jom Bawgal on, no arda e duule iwrude ka kammu.»

⁶⁵ Onsay yottinoowo mawdo sadaka on seeki conci mun din, wi'i: «O hoynii Alla! Ko seedeeji hondi kadi faaladen? On nanii hoyre makko nden! ⁶⁶ Ko hondun sikkudon?»

Be jaabii mo, be wi'i: «Himo foddi e mayde!»

⁶⁷ Onsay ɓe tutti mo ka yeeso, ɓe uttii mo, wobbe ɓen bantii mo ⁶⁸ e hoore hibe wi'a: «Ko an yo Almasiihu, hotto ko hombo luubi-maal!»

Fii no Petruusu Yeddiri fii Iisaa

(*Mrk. 14.66-72; Luk. 22.54-62; Yhn. 18.15-18, 25-27*)

⁶⁹ Onsay tawi Petruusu no joodii ka nder tata. Debbo kurkaaduujo ari badii mo, wi'i: «An kadi hisa wondunoo e Iisaa, oo jeyaado Jaliilu.»

⁷⁰ Kono o yeddi yeeso fow, o wi'i: «Mi andaa ko wondaa wowlude!»

⁷¹ Wa ko o fokkitiri ka dambugal njanal, debbo kurkaaduujo goo kadi yi'i mo, wi'i wonnoobe don ɓen: «Oo no wondunoo e Iisaa, oo jeyaado Naasirata.»

⁷² O yeddi kadi e nder woondoore, o wi'i: «Mi andaa oo neddo!»

⁷³ Bay nettii seeda, wonnoobe don ɓen badii, wi'i Petruusu: «Ka haqiiqa ko a goddo e mabbe, ko fii haala maa kan no holli iwdi maa ndin.»

⁷⁴ Onsay o woni e huditagol woonda, wi'a: «Mi andaa oo neddo!» Tun, ndontoori ndin yoggi. ⁷⁵ Petruusu anditi kisan kongol ngol Iisaa wi'unoo mo ngol, wonde: «Ado ndonto yoggude, a yedday fii an laabi tati.» Onsay o yalti ka yaasi, o wulli wullaandu sattundu.

Fii no Iisaa Nabiraa ka Pilaatu

(*Mrk. 15.1-15; Luk. 23.1-7, 13-25; Yhn. 18.28-40*)

27¹ Bay weetii, hooreebe *yottinoobe sadaka ɓen fow e mawbe jamaa on fewjodi fii no ɓe warira Iisaa. ² Bay wonii ɓe habbii mo, ɓe nabi mo, ɓe watti e juude Pilaatu, dun ko hooreejo diiwal ngal.

Fii no Yudaasi Wartori

(*Sah. 1.18-19*)

³ Bay Yudaasi janfiido mo on tawii Iisaa happanaama wareede, o ninsi, o natti tammaaji cappande tati kaalisi din ka hooreebe yottinoobe sadaka ben e ka mawbe ben, ⁴ e hoore himo wi'a: «Mi wadii junuubu, fawugol mo bonnaa mayde.»

Be jaabii mo, be wi'i: «Haaju amen e dun? Dun ko haaju maa!»

⁵ Onsay Yudaasi bugii tammaaji kaalisi din ka nder *juulirde mawnde, o iwi don, o yahi, o wengitoyii.

⁶ Hooreebe yottinoobe sadaka ben moobiti tammaaji kaalisi din, be wi'i: «Dagaaki ka di wattee ka marirde laabunde, ko fii ko di coggu yiyan.»⁷ Bay wonii be fottanii, be yetti din mbuudi, be soodi ngesa mahoowo paya fii ko wona berde hobbe. ⁸ Ko dun wadi si mban ngesa no wi'ee haa hande Ngesa Yiyan. ⁹ Ko nii ko annabi Yeremiiya wi'unoo kon laatori, wonde: «Be yetti tammaaji cappande tati kaalisi din, dun ko mbuudi di *Isra'ilayankeebe ben fottunoo yobugol fii makko din, ¹⁰ be soodii di ngesa mahoowo paya, wano Joomiraado on yamirirnood lan non.»^d

Fii no Pilaatu Landori Iisaa

(*Mrk. 15.2-15; Luk. 23.2-5, 13-25; Yhn. 18.29-40*)

¹¹ Bay wonii Iisaa bannaama yeeso hooreejo diwal ngal, kanko hooreejo on o landii mo, o wi'i: «Hara ko an woni lando Yahuudiyanke'en?»

Iisaa jaabii mo: «Ko wano wi'irdaa non.»¹² Kono o jaabaaki huunde e ko hooreebe yottinoobe sadaka ben e mawbe ben toonata mo kon.

^d27.10 Yer. 18.2-3 e Zak. 11.12-13.

¹³ Onsay Pilaatu landii mo, wi'i: «A nanaali koo ko ɓe woni seeditaade e hoore maa fow?»¹⁴ Kono Iisaa jaabaaki mo hay huunde e dun. Dun ɣaldini hooreejo diwal ngal fota.

¹⁵ Tawi juldeere kala, hooreejo diwal ngal no woowi accitande ɓe kasoojo gooto, mo jamaa on torinoo fii mun woo. ¹⁶ Hari hibe marnoo kasoojo andanoodo fii mun, wi'eteedo Barabaasi. ¹⁷ Nde tawnoo hibe moobondiri, Pilaatu landii ɓe, o wi'i: «Ko hombo e bee faaladon yo mi accitan on? Ko Barabaasi kaa ko Iisaa, wi'eteedo *Almasiihu on?»¹⁸ Ko fii hari himo andunoo ko sabu nawliigu ɓe wadir Iisaa e joge.

¹⁹ Wa fewndo ko o joodii himo naawude ka naawirdu, ɓeyngu makko nuli e makko, wi'i: «Wota a ukko e fii oo feewudo, ko fii hande mi tampii fota e koydol fii makko.»

²⁰ Kono hooreebe yottinoobe sadaka ɓen e mawbe ɓen yuuni jamaa on tortagol Barabaasi, ɓe wara Iisaa. ²¹ Onsay hooreejo diwal ngal yetti haala kan, wi'i ɓe: «Ko hombo e hakkunde bee dido faaladon yo mi accitan on?»

Be jaabii: «Ko Barabaasi!»

²² Pilaatu wi'i be kadi: «Ko hondun non mi wadata Iisaa, oo wi'eteedo Almasiihu?»

Fow jaabii: «Ko yo o fempe!»

²³ Kanko hooreejo diwal ngal, o wi'i: «Hara ko bone hombo oo wadi?»

Be burti ewnaade, wi'a: «Yo o fempe!»

²⁴ Bay Pilaatu tawii alaa waawude huunde, awa kadi murtaldu ndun ɓeydoto woni, onsay o yetti ndiyan, o soodii e tawnde jamaa on, o wi'i: «Min mi tawetaake e hibbugol yiyan oo dan! Dun ko onon wonani!»

²⁵ Onsay jamaa on fow jaabii, wi'i: «Si men tooju mo, yo yiyan makko dan hibbitu e hoore amen, e hoore bibbe amen ɓen kadi!»

²⁶ Bawto d'un, Pilaatu accitani ɓe Barabaasi. Bay wonii Iisaa gaynaama focceede, kanko Pilaatu o wattu mo e juude mabbe fii yo o fempe.

Fii no Suufaaɓe ben Wadiri Iisaa Jalnori

(*Mrk. 15.16-20; Luk. 23.11; Yhn. 19.2-3*)

²⁷ Onsay suufaaɓe hooreejo diiwal ngal nabi Iisaa ka nder suudu laamu, ɓe mottindiri dental suufaaɓe ɓen fow, ɓe hunditi mo. ²⁸ Be borti mo conci din, ɓe borni mo dolokke bodeejo.^{d29} Be sacci katanwol bulle, ɓe wadi ka hoore makko, ɓe tambini mo kalinwol ka jungo makko jaamo. E hoore d'un ɓe ari, ɓe jicci yeeso makko e nder jalnori, e hoore hibe wi'a: «Salminaango e maa, yaa an lando Yahuudiyankeebé!»³⁰ Be tutti mo, ɓe yetti kalinwol ngol, ɓe tappiri mo ka hoore. ³¹ Bay wonii ɓe gaynii mo wadude jalnori, ɓe borti mo dolokke on, ɓe borni mo conci makko din, ɓe nabi mo fii fempo yegol.

Fii no Iisaa Wariraa

(*Mrk. 15.21-32; Luk. 23.26-43; Yhn. 19.17-27*)

³² Ko ɓe yaltata, ɓe fotti e gorko mo Sirenii wi'eteedo Sim'uunu, ɓe karhi mo nabugol *leggal Iisaa altindiraangal ngal. ³³ Bay wonii ɓe hewtii e ndee nokkuure wi'eteende Golgota, ko woni firo dun ko «Nokkuure Laalagal Hoore», ³⁴ ɓe okkori mo njaram jillaadan hahhannde. Kono bay o mettike dan, o jabaali yarude. ³⁵ Bay wonii ɓe fempii mo, ɓe sendiri conci makko din urba.^{e36} E hoore dun ɓe joodii don, ɓe ayni mo. ³⁷ Be wadi ka dow hoore makko bindi bangindi fii ko o happiranaa kon, dun ko: «Ko oo woni Iisaa Lando Yahuudiyanke'en.»³⁸ Tawi wuybe dido no fempidaa e makko, goddo on ka sengo makko jaamo, oya on ka nano makko. ³⁹ Tawi feyyooɓe ben no hoyna mo, hayla hoore, ⁴⁰ hara hibe wi'a: «An oo

^d27.28 Ko dolokke bodeejo lando on bornotonoo.

^e27.35 Zab. 22.19

wi'unoodo lancay juulirde mawnde nden, darnita nde e nder balde tati, dandito an tigi! Si tawii ko an woni *Biddo Alla on, tippo ka leggal altindiraangal don!»

⁴¹ Tawi hooreebe yottinoobe sadaka ɓen e jannoobe fii Sariya on ɓen e mawɓe ɓen kajun kadi no jalaynoo mo, wi'a: ⁴² «O dandii ɓeyya, kono o waawataa dandude hoore makko? Si ko o lando Isra'iila'en, yo o jippo ka leggal altindiraangal, dün en gomdinay mo. ⁴³ Bay himo halfinii e Alla, yo Allaahu on dandu mo jooni si himo yidi mo, ko fii o wi'ii ko o Biddo Alla!»⁴⁴ Tawi wuybe ɓe o fempidaa ɓen no yennira mo wano non kajun kadi.

Fii Mayde Iisaa nden

(Mrk. 15.33-41; Luk. 23.44-49; Yhn. 19.25-30)

⁴⁵ Gila naange e hoore, niwre wadi e leydi ndin fow haa ka baawo fanaa. ⁴⁶ Telen wa ka baawo fanaa, Iisaa ewnii ko tiidi, o wi'i: «Iilooyi, Iilooyi, lama sabaxtanii?»^f (Dun no firi: Alla an, Alla an, ko fii hondun tertanidaa mi?)

⁴⁷ Wobbe e wonnoobe don ɓen nani ko o wi'i kon, ɓe wi'i: «O noddii Iiliya!»⁴⁸ Tun, goddo e mabbe dogi, yettoyi linsere, o babbini nde haa nde loppii ndiyen lammudan, o wadi nde e tuggordu, o townani mo fii yo o yaru. ⁴⁹ Kono ɓeyya wi'i: «Accu, ndaaren si Iiliya aray danda mo.»

⁵⁰ Iisaa ewnii kadi ko tiidi, o timmi.

⁵¹ Onsay *wirngallo ngon ka juulirde mawnde seekii, woni pecce didi, gila dow haa ley. Leydi ndin dimbii, pete den feccii. ⁵² Genaale den udditii, balli yimbe Alla maayunoobe buy immitii, ⁵³ ɓe yalti ka genaale, ɓe naati ka saare hormorde ɓawto immitagol Iisaa, ɓe feejani yimbe duudube.

⁵⁴ Bay hooreejo suufaabe ɓen e wondunoobe e makko ɓen fii aynugol Iisaa yi'ii ko leydi ndin dimbii kon e ko ari e wadude kon, ɓe huli fota, ɓe wi'i: «Ka haqiiqa, hari oo ko Biddo Alla!»

^f27.46 Zab. 22.2

⁵⁵ Tawi rewbe duudube no ka wodditii, no ndaara, tawi ko ben tigi jokkunoo Iisaa gila Jaliilu fii ko kurkanoo mo. ⁵⁶ Tawi no tawdanoo e mabbe Mariyama jeyaado Magaduuna, e Mariyama yumma Yaaquuba e Yuusufu, e yumma bibbe Zabadii ben.

Fii no Iisaa Suriraa

(*Mrk. 15.42-47; Luk. 23.50-56; Yhn. 19.38-42*)

⁵⁷ Bay nibbii, aaden aldudo, wi'eteedo Yuusufu jeyaado Raamati ari, tawi on kadi ko taalibaajo Iisaa. ⁵⁸ O yahi ka Pilaatu, o torii mo hettugol furee Iisaa on. Onsay Pilaatu yamiri jonnugol mo mo. ⁵⁹ Bawto dun, kanko Yuusufu o yetti furee on, o tumbi e kasannge laabudo, ⁶⁰ o belnoyi mo e qaburu keso mo o asunoo e feti fii hoore makko. O talli hayre njannde, o wadi ka dambugal qaburu, o yahi. ⁶¹ Tawi Mariyama jeyaado Magaduuna e Mariyama oya no joodii don, fewtondiri e yenaande nden.

Fii no be Ayniri Yenaande Iisaa nden

⁶² Bimbi nden jande, dun ko jande bawto hebulanagol fii *aseweere nden, hooreebe yottinoobe sadaka ben e *Fariisiyaabe ben yaadi ka Pilaatu. ⁶³ Be wi'i: «Koohoojo, men anditii, oo majjinoowo wi'uno wa fewndo ko o wuuri, si balde tati feyfii o immitoto. ⁶⁴ Awa yamir fii yo yenaande nden ayne haa ka jalaande tammere, fii wota taalibaabe makko ben aru wujjita furee on, wi'a jamaa on wonde o immitike e hakkunde maybe ben. Dun, nden majjinannde don buray aranere nden.»

⁶⁵ Onsay Pilaatu wi'i be: «E hino suufaabé ko yaha ayna. Yahee ayninon be yenaande nden yero no waawirdon woo.»⁶⁶ Onsay be yahi ka yenaande, be burti hibbude hayre nden, nota. Be joddini don aynoobe ben.

Fii Ummutal Iisaa Almasiihu on

(*Mrk. 16.1-10; Luk. 24.1-12; Yhn. 20.1-10*)

28¹ Bay *jalaande fowteteende nden fey়ii, e alat ka subaka, dñun ko jallal aranal e
nder yontere nden, Mariyama jeyaado Magaduuna e Mariyama oya yahi
ndaarugol yenaande nden. ²Tawi dimbannde leydi tiifunde wadii, ko fii hari
malaa'ikaajo Joomiraado on tippike iwrude ka kammu, tallii hayre ombiranoonde
yenaande nden, joodike e hoore mayre. ³Tawi yeeso makko ngon no wa'i wa
ndaygu, dolokke makko on kadi no rawniri wa cuddi. ⁴Hakkee ko ben suufaaбе
aynunoobe don diwni kulol, бe wa'i wa maybe.

⁵ Kono malaa'ikaajo on wi'i ben rewbe: «Onon wota on hulu, ko fii mido andi ko
Iisaa fempaado on wondon dabbitude. ⁶Awa o alaa doo, o immitike, wano o
wiirunoo non. Aree ndaaron nokkuure ka o belinoo don. ⁷Yahon tinna,
andinoyon taalibaabe makko ben wonde o immintinaama e hakkunde maybe ben,
awa kadi o adoyto on Jalilu. Ko ton yi'oyton mo. Awa, mi yeetike on dñun.»

⁸ Onsay бe pottitii yenaande nden heja, e hoore hibe huli, wondude e weltaare
mawnde. Be dogi fii yeetoyagol taalibaabe ben on kibaaru. ⁹Onsay Iisaa ari fotti e
mabbe, o wi'i бe: «Mi salminii on!» Onsay бe badii, бe nangi koyde makko den, бe
sujjani mo. ¹⁰Bawto dñun Iisaa wi'i бe: «Wota on hulu. Yahee, humpitoyon
musibbe an ben, yo бe yahu Jalilu, ko ton бe yi'oytammi.»

Fii ko Suufaaбе ben Sifii kon

¹¹ Wa fewndo ko ben rewbe woni ka laawol, tawi wobbe e suufaaбе ben naatii ka
saare, бe yeetike hooreebe *yottinoobe sadaka ben ko wadi kon fow. ¹²Bay wonii
ben hooreebe yottinoobe sadaka mottondirii e mawbe ben, бe fewjodi, бe yeeni
suufaaបe ben kaalisi duududo, ¹³ бe wi'i бe: «On wi'ay wonde taalibaabe makko
ben arno jemma, wujjiti mo fewndo ko daanidon. ¹⁴ Si hooreejo diiwal ngal non
aru e nanude fii dñun, men yahay, men yewta mo haa o hooloo, men itta on e

annde.»¹⁵ Onsay suufaaþe þen yetti kaalisi on, þe wadiri wano þe wi'iraa non. Kaa haala lolli e hakkunde Yahuudiyankeebé þen haa weetaango hande ngoo.

Fii no Iisaa Feenirani Sahaabaabe þen

(*Mrk. 16,14-18; Luk. 24,36-49; Yhn. 20,19-23; Sah. 1,6-8*)

¹⁶ Taalibaabe þen sappoo e goo yahi Jaliilu, e hoore ngoo fello ngo Iisaa toddaninoo þe. ¹⁷ Bay wonii þe yi'ii mo, þe sujjani mo. Kono wobbe e mabbe sikkitii. ¹⁸ Iisaa badii þe, wi'iri þe nii: «Mi yedaama kala bawgal ka kammu e ka hoore leydi, ¹⁹ awa yahee, wadon leyýi din fow taalibaabe, *looton þe maande kisiyee e innde Baabaajo on e Biddo on e *Ruuhu Seniido on, ²⁰ waajodon þe doftagol ko mi yamiri on kon fow. Awa, mido wondi e mon ñande woo, haa ka lannoode aduna.»

ÉVANGILE SELON MATTHIEU

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée